

Li Hu Apocalipsis li Quixtz'iba li San Juan

Li quic'utbesic chiru laj Juan xban li Jesucristo

¹ Li tz'ibabil sa' li hu a'in quic'utbesic chiru li Jesucristo xban li Dios. Quixc'utbesi chiru li Jesucristo re nak a'an chic tac'utbesink re chiruheb laj pabanel li c'a'ru tac'ulmank chi seb. Jo'can nak li Jesucristo quixtakla lix angel chixc'utbesinquil a'in chiru laj Juan laj c'anjel chiru. ² Ut a'an quixye resil chixjunil li quic'utbesic chiru. A'an a'in li quixye li Dios jo' quic'utbesic chiru laj Juan xban li Jesucristo. ³ Us xak re li ani naril xsa' li hu a'in ut naxq'ue retal li c'a'ru naxye. Us xak re li ani naxbanu li c'a'ru tz'ibabil chi sa' xban nak relic chi yal nak yo chi cuulac xk'ehil nak tac'ulmank li c'a'ru naxye.

*Laj Juan quixtakla xsahil xch'oleb li cuukub
ch'utaleb chi aj pabanel aran Asia*

⁴ Lain laj Juan. Yоquin chi tz'ibac eriq'uin laex li cuukub ch'utalex chi aj pabanel li cuanquex aran Asia. A' taxak li usilal ut li tuktuquilal chi cuank eriq'uin li naxq'ue li Dios li ac cuan chak sa' xticlajic, li cuan anakcuán, ut li cuank chi junelic, ut li naxq'ue li Santil Musik'ej li cuan cui' lix lok'laj c'ojaribal li Kacua'. ⁵ A' taxak li usilal ut li tuktuquilal chicuank eriq'uin li naxq'ue li Jesucristo li tic xch'ol chixyebal li yal. Li Jesucristo a'an li xbен li quicuaclí chi yo'yo sa'

xyankeb li camenak. A'an li k'axal nim xcuanguard sa' xbeneb chixjunileb li cuanqueb xcuanguard sa' ruchich'och'. A'an quirahoc ke ut a'an quiisin re li kamac nak quihoye' lix quiq'uel nak quicam sa' kac'aba'. ⁶ A'an naq'uehoc kacuanquid re toc'anjelak chok' aj tij chiru li Acuabej Dios. Lok'oninbil taxak li Jesucristo. Nimanbilak taxak ru ut a'an taxak chicuank xcuanguard sa' xben chixjunil chi junelic k'e cutan. Jo'can taxak. ⁷ Q'uehomak retal. A'an tachalk chak sa' li chok ut chixjunileb te'ilok re. Te'ril ajcui' eb li que'camsin re. Chixjunileb li cuanqueb sa' ruchich'och' te'yot'ek' xch'ol ut te'yabak xban li raylal li te'xc'ul. Jo'can taxak chic'ulmank. ⁸ Quixye li Kacua' Dios: —Lain quinyo'obtesin re chixjunil ut lain tinsachok re chixjunil. Lain li Alfa ut li Omega. Ut k'axal nim incuanquid, chan li nimajcual Dios.

Nak quic'utbesic li Cristo chiru laj Juan sa' visión

⁹ Lain laj Juan, le rech aj pabanelil. Lain xintz'akon ajcui' riq'uin xcuybal li raylal sa' xc'aba' li Jesucristo erochben laex li sic'bil eru xban li Kacua'. Lain cuanquin arin sa' li na'ajej Patmos li sutsu riq'uin ha' xban nak xinch'olob xyalal li ratin li Dios ut xinye resil li Jesucristo. ¹⁰ Sa' li cutan nak nakach'utub kib chixlok'oninquil li Kacua', riq'uin xcuanguard li Santil Musik'ej, li Dios quixc'utbesi jun li visión chicuu. Quicuabi jun xyab cucx chiciuix. Chanchan xyab jun li trompeta yo chi ec'anc. ¹¹ Quixye cue: —Li c'a'ru tinc'utbesi chacuu tatziiba sa' jun li botbil hu ut tatakla riq'uineb li cuukub

ch'utaleb laj pabanel li cuanqueb sa' xcuent Asia. Takla riq'uineb li cuanqueb Efeso, Esmirna, ut Pérgamo. Ut tatakla ajcui' riq'uineb li cuanqueb Tiatira, Sardis, Filadelfia ut Laodicea, chan. ¹² Ut nak quin-iloc chicuix chirilbal ani yo chi aqinanc cue, quicuil cuukub li candelero cuan xxamlel yibambil riq'uin oro. ¹³ Ut sa' xyankeb li candelero xakxo li C'ajolbej. Chanchan na-iloc jun cuink nak quicuil. Toj chi rok nacuulac xnimnal rok li rak'. Cuan jun c'amal sa' yibambil riq'uin oro chire xch'ol. ¹⁴ Li rismal xjolom sak sak jo' xsakal li nok' lana. Chanchan xsakal li nieve. Ut lix nak' ru nalementz'un chanchan xam. ¹⁵ Li rok nalementz'un chanchan li chabil ch'ich' bronce ut cakjorin chanchan li k'an ch'ich' nak cuan sa' xam. Nak naqatinac chanchan xyab lix cau ok li palau. ¹⁶ Sa' lix nim uk' chapcho cuukub li chahim. Ut sa' re cuan jun li ch'ich' ca' pac'al xk'esnal. C'ajo' nalementz'un li ru. Chanchan nak nalementz'un li sak'e. ¹⁷ Nak quicuil ru quint'ane' chi rok. Chanchan camenak quincana. Ut a'an quixq'ue lix nim uk' sa' inben ut quixye cue: —Matxucuac. Lain li ac cuanquin chak sa' xticlajic li ruchich'och' ut cuqkin chi junelic k'e cutan. ¹⁸ Lain yo'yoquin. Lain quincam, abanan yo'yoquin chic chi junelic k'e cutan. Lain cuan incuanquil sa' xb'en li cämc. Ut lain ajcui' yal cue sa' xb'en li na'ajej li neque'xic cui' li camenak. ¹⁹ Tz'iba retalil li c'a'ru yocat chirilbal xban nak a'an retalil li yo chi c'ulmanc anakcuán ut li tac'ulmank mokon. ²⁰ Lix yalal li cuukub chi chahim li xacuil sa' lin nim uk', a'an li retalileb li cuukub lix takl li Dios li neque'iloc reheb li cuukub ch'utal chi aj pabanel. Ut lix yalal li cuukub chi

candelero, a'an retalileb li cuukub ch'utal chi aj pabanel.

2

A'in li esilal li quixtakla riq'uineb laj pabanel li cuanqueb Efeso

¹ Tz'ib'an riq'uin lix takl li Dios li na-iloc reheb li jun ch'utal chi aj pabanel li cuanqueb Efeso ut taye re chi jo'ca'in: —Li cuan cuukub chi chahim sa' xnim uk', li yo chi b̄ec sa' xyankeb li cuukub chi candelero yo chixyebal ere chi jo'ca'in: ² Lain ninnau chixjunil li nequebanu. Ninnau nak cau nequexc'anjelac ut ninnau ajcui' nak inc'a' nach'inan ech'ol. Ninnau nak xic' nequeril li neque'xbanu māusilal. Xeq'ue retal li ani xe'xq'ue ribeb chok' apóstol ut mācua'eb. Ut xenau nak aj balak'eb ut aj tic'ti'eb. ³ Ninnau nak nabal li raylal xec'ul sa' inc'aba' lain. Abanan nequecuy xnumsinquil. Ut inc'a' xch'inan ech'ol. Ninnau nak cau nequexc'anjelac yal xban inrabal lain. ⁴ Abanan cuan jun epalti chicuu. Laex inc'a' chic niquinera jo' nak xinera chak junxil. ⁵ Cheq'uehak retal c'a'ru xexpalto' cui'. Chijulticok' ere chanru nak xinera chak junxil. Yot'omak ech'ol ut jalomak ec'a'ux ut chinera hak cui'chic jo' nak xinera chak junxil. Cui inc'a' tayot'ek' ech'ol ut tejal ec'a'ux, lain tincuisi le candelero sa' xna'aj chi junpat. ⁶ Abanan cuan jun li us nequebanu. Laex xic' nequeril li māusilal li neque'xbanu li neque'taken re li cuink laj Nicolás. Jo'can ajcui' lain. Xic' nacuil li māusilal li neque'xbanu eb a'an. ⁷ Cui teraj xtaabal ru li xyalal, cheq'uehak retal

li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, lain tinq'ue lix yu'am chi junelic. Ut a'an tacuank riq'uin li Dios chi junelic sa' lix santil na'aj, chan li C'ajolbej reheb laj Efeso.

Li esilal li quixtakla riq'uineb laj pabanel li cuanqueb Esmirna

⁸ Ut quixye cui'chic cue: —Tz'ib'an riq'uin lix takl li Dios, li na-iloc reheb li jun ch'utal chi aj pabanel li cuanqueb Esmirna. Ut taye re: Li ac cuan chak sa' xticlajic ut cuank ajcui' toj sa' roso'jic, li quicam ut quicuacli cui'chic chi yo'yo sa' xyank'eb li camenak, naxye ere chi jo'ca'in:
⁹ Lain ninnau chanru cuanquex. Ninnau chixjunil li raylal nequec'ul. Ninnau nak neba'ex. Abanan cuan ebiomal riq'uin li Dios. Ninnau nak nequemajecuac xbaneb li neque'xye nak tz'akaleb aj judío, abanan inc'a' neque'e'c'anjelac chiru li Dios. Aj c'anjeleb ban chiru laj tza. ¹⁰ Mexxucuac xban li raylal li tachalk sa' eben. Cuanqueb sa' eyank li te'q'uehek' sa' tz'alam xbaneb laj c'anjel chiru laj tza re xyalbal rix le pabal. Tec'ul raylal, abanan inc'a' najt tec'ul. Mich'inan ech'ol. Cauhak ban ech'ol toj chirix le camic ut lain tinq'ue ere le k'ajcamunquil. Chanchan nak tinq'ue le corona nak tinq'ue le yu'am chi junelic. ¹¹ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, li jun a'an inc'a'

tixc'ul lix cab xcamic. Inc'a' t_{aq}xic sa' xbalba, chan li C'ajolbej reheb laj Esmirna.

Li esilal li quixtakla riq'uineb laj pabanel li cuanqueb Pérximo

¹² Ut quixye cui'chic cue: —Tz'ib'an riq'uin lix takl li Dios li na-iloc reheb laj pabanel li cuanqueb Pérximo ut taye re: Li cuan xch'ich' ca' pac'al xk'esnal naxye ere chi jo'ca'in: ¹³ Lain ninnau chanru nak cuanquex. Lain ninnau nak cuan xcuquil laj tza sa' li tenamit li cuanquex cui'. Abanan l_aex toj yoquex chinlok'oninquil. Inc'a' xecanab inpabankuil usta quicamsic laj Antipas xban nak quixye cuesilal aran sa' le tenamit li cuan rubel xcuquil laj tza. ¹⁴ Abanan cuan c'a'ak re ru yoquex chixb_anunquil inc'a' us xban nak cuanqueb sa' eyank li toj yoqueb chixq'uebal xcuquil lix tijleb laj Balaam li quic'utuc chiru laj Balac chanru nak tixq'ueheb chi m_acobc laj Israel. Quixye reheb nak taruk te'xtzaca li tzacaemk li mayejanbil chiru li jalanil dios. Ut quixtacchi'iheb re nak te'yumbetak ut te'co'b_etak. ¹⁵ Ut cuanqueb ajcui' sa' eyank li toj neque'xq'ue xcuquil lix tijleb laj Nicolás. Lain xic' nacuil li mausilal li neque'xb_anu eb a'an. ¹⁶ Jo'can nak isihomakeb sa' eyank li inc'a' useb xna'leb. Cui inc'a' nequerisiheb, lain tinxic chi junpat eriq'uin ut tinpletik riq'uineb. Chanchan nak tincamsiheb riq'uin k'esnal ch'ich' nak tinsach ruheb riq'uin li cuatin. ¹⁷ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, lain tinq'ue

li choxahil cua li inc'a' na-ilman ru chixtzaca. Ut tinq'ue ajcui' jun li saki pec re ut tz'ib'anbilak chiru jun li ac' c'aba'ej. Mä ani tana'ok re li c'aba'ej. Ca'aj cui' li ani li tac'uluk re, chan li C'ajolbej reheb laj Pérgamo.

Li esilal li quixtakla riq'uineb laj pabanel li cuanqueb Tiatira

¹⁸ Ut quixye ajcui' cue: —Tz'ib'an riq'uin lix takl li Dios li na-iloc reheb li jun ch'utal chi aj pabanel li cuanqueb Tiatira ut taye re: Li C'ajolbej, li nalemtz'un xnak' ru chanchan xam ut li rok chanchan li chabil ch'ich' bronce li nalemtz'un, naxye ere chi jo'ca'in: ¹⁹ Lain ninnau chanru nak cuanquex. Ninnau nak nequexrahoc ut nequexpabán. Ninnau nak cau nequexc'anjelac chicuu ut nabal li raylal nequecuy. Lain ninnau nak k'axal cui'chic cau yoquex chi c'anjelac chiru li xebanu junxil. ²⁰ Abanan inc'a' nacuulac chicuu nak nequec'am erib sa' usilal riq'uin li ixx li yibru xna'leb li chanchan lix na'leb lix Jezabel. Li ixx a'an naxq'ue rib chok' xprofeta li Dios, abanan moco yal ta. Yo ban chixbalak'inquileb laj c'anjel chicuu. Riq'uin li naxbanu yo chixc'ambaleb xbe chi yumbetac ut chi co'bетac. Ut yo ajcui' chixc'ambaleb xbe chixtzacanquil li tzacaemk mayejanbil chiru li jalanił Dios. ²¹ Lain xcuaj raj nak tixyot' xch'ol ut tixjal xc'a'ux ut xcuoybeni re tixbanu. Abanan inc'a' naraj xcanabanquil li mausilal. ²² A'ut anakcuan lain tinq'ue junak yajel sa' xb'en re nak tat'anek' sa' ch'at. Ut eb li neque'xbanu mausilal riq'uin te'xc'ul ajcui' li raylal cui inc'a' neque'yot'e' xch'ol ut cui inc'a' neque'xcanab xbanunquil li

mäusilal li naxbanu a'an. ²³ Ut tink'axtesiheb chi cämc li neque'taken re. Ut riq'uin a'in te'xq'ue retal chixjunileb laj päbanel nak laín ninnau c'a'ru nanume' sa' xch'oleb li junjunk. Lain ninnau c'a'ru nequec'oxla. Ut laín tinq'ue ek'ajcämunquil chejunkal a' yal chanru le yehom ebanuhom. ²⁴ Mac'a' tinye ere re ek'usbal laex aj Tiatira li jo' q'uialex inc'a' xetzol erib riq'uin li tijleb li neque'xch'olob eb a'an, xban nak a'an xmaus aj na'leb laj tza. ²⁵ Ca'aj cui' tinye ere a'in: Cacuubre-sihomak ech'ol sa' le pabal toj tacuulak xk'ehil nak tincuulak eriq'uin. ²⁶ Li ani naxcuy xnum-sinqual chixjunil li raylal a'in ut inc'a' nach'inan xch'ol sa' lix pabal ut tixbanu li c'a'ru nacuaj toj sa' roso'jic, laín tinq'ue xcuanguil chi taklanc sa' xbeneb li tenamit. ²⁷ Eb a'an te'taklank sa' xbeneb li tenamit chi cau. Chanchan nak te'xtaklaheb riq'uin jun li xuk' ch'ich'. Ut tasachek' xcuanguijeb li te'taklank cui'. Chanchan nak najore' junak ch'och' uc'al. Laín tinq'ue lix cuanguileb jo' li cuanguil li quixq'ue cue lin Yucua'. ²⁸ Ut laín tinq'ue ajcui' reheb lix lok'aleb, chanchan xch'ina'usal li cak chahim. ²⁹ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel, chan li C'ajolbej reheb laj pabanel li cuanqueb Tiatira.

3

Li esilal li quixtakla riq'uineb laj pabanel li cuanqueb Sardis

¹ Ut li C'ajolbej quixye cui'chic cue: —Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Sardis ut taye re: Li

cuan li Santil Musik'ej riq'uin ut li cuan li cuukub chi chahim sa' ruk' naxye ेre chi jo'ca'in: Lain ninnau chanru nak cuanquex. Eb li tenamit neque'xye nak laex tz'akal aj pabanelex. Abanan moco yal ta. Lain ninnau nak inc'a' nequexpabán chi tz'akal. Chanchan camenakex. ² Q'uehomak retal chanru nak cuanquex. Laex inc'a' tz'akal re ru le yu'am chiru li Kacua' Dios. Jo'can nak q'uehomak ech'ol chi pabanc chi tz'akal ut mich'inan chic ech'ol. ³ Chijulticok' ेre li xyalal li querabi chak junxil. Chiyot'ek' ech'ol ut jalamak ec'a'ux. Cacuubresihomak ech'ol sa' le pabal. Cui inc'a' tebanu a'an, lain tincuulak eriq'uin chi mac'a' sa' ech'ol jo' naxbanu laj elk' ut tinrakok atin sa' eben. ⁴ Lain ninnau nak aran Sardis toj cuanqueb cuib oxib sa' eyank li tjc xch'oleb. Inc'a' xe'xtz'ajni ribeb riq'uin xbannunquil li mausilal. Lain tinye reheb nak xc'ulubeb cuanc cuiq'uin chi tiktoqueb riq'uin saki ak'ej xban nak tjc xch'oleb. ⁵ Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, a'an tatikibak riq'uin saki ak'ej. Ut lain inc'a' tinsach lix c'aba' sa' li hu tz'ibanol cui' xc'aba'eb li cuanqueb xyu'am chi junelic. Ut chiru lin Yucua' ut chiruheb ajcui' lix ángel, lain tinye nak a'an cualal inc'ajol. ⁶ Cui teraj xtaubal ru lix yalal, cheq'uehak retal li naxye li Santil Musik'ej reheb laj pabanel. Jo'ca'in quixye li C'ajolbej reheb laj pabanel li cuanqueb Sardis.

Li esilal li quixtakla riq'uineb laj pabanel li cuanqueb Filadelfia

⁷ Ut li C'ajolbej quixye cui'chic cue: —Tz'ib'an riq'uin lix takl li Dios li na-iloc reheb li jun ch'utal chi aj pābanel li cuanqueb Filadelfia, ut tāye re: Li tīc xch'ol ut li tz'akal Dios, a'an cuan xcuauquial jo' li cuanquil li quiq'uehe' re laj David junxil. Li oquebal li tixte a'an, mā ani naru tātz'apok re; ut li oquebal li tixtz'ap a'an, mā ani naru tātehok re.

⁸ A'an yo' chixyebal ȇre chi jo'ca'in: Lāin ninnau chanru nak cuanquex. Lāin xinte li oquebal cheru ut mā ani naru tātz'apok re. Ninnau nak inc'a' cau ȇrib. Abanan inc'a' xinetz'ektana. Junelic ban nequebanu li c'a'ru ninye. ⁹ Cuanqueb li neque'xbānu li c'a'ru naraj laj tza. Neque'xye nak tz'akaleb aj judío, abanan inc'a' neque'c'anjelac chiru li Dios. Yal tic'ti' neque'xye. Lāin tin-canabeb toj retal te'xcuik'ib ribeb cheru re nak te'xq'ue retal nak lāin ninrahoc ȇre. ¹⁰ Laex xecuy xbanunquil li xinye ȇre ut inc'a' xch'inan ȇch'ol sa' le pābal. Jo'can nak lāin tincolok ȇre sa' xk'ehil nak tāchālk li raylal sa' xbeneb chixjunileb li cuanqueb sa' ruchich'och'. ¹¹ Lāin chi seb tincchalk. Tincuulak ȇriq'uin. Jo'can nak cauhak taxak ȇch'ol sa' le pābal ut mecanab inpābanquil re nak tec'ul le k'ajcamunquil li tinq'ue ut re ajci' nak inc'a' taq'uehek' re jalan. ¹² Li ani tixcuy xnumsinquil li raylal ut inc'a' tāch'inānk xch'ol sa' lix pābal, tinq'ue xlok'al ut mā ani taruk tāisink re sa' lix na'aj li taq'uehek' re xban lin Yucua'. Chanchanak li okech li nacutun re lix templo li Dios, li inc'a' na-ec'an sa' xna'aj. A'an tācuank riq'uin lin Yucua' chi junelic sa' li Ac' Jerusalén li tixq'ue lin Yucua' cuan sa' choxa. Ac' chic lix c'aba' tinq'ue. Ut chixjunileb te'xnau nak a'an

ralal xc'ajol lin Yucua'. Ut tinq'ue ajcui' re lin c'aba' laín. ¹³ Cui téraj xtaubal ru li xyáal, cherabihak li naxye li Santil Musik'ej reheb laj pabanel. Jo'ca'in quixye li C'ajolbej reheb laj pabanel li cuanqueb Filadelfia.

Li esilal li quixtakla riq'uineb laj pabanel li cuanqueb Laodicea

¹⁴ Ut li C'ajolbej quixye cui'chic cue: —Tz'íban riq'uin lix takl li Dios li na-iloc reheb li jun ch'utal chi aj pabanel li cuanqueb Laodicea ut taye re: Li ani naxc'aba'in "Amén", li junelic tíc xch'ol chixyebal li yal, li ac cuan chak nak quiyibac chak li ruchich'och' ut chixjunil li c'a'ak re ru cuan, naxye ere chi jo'ca'in: ¹⁵ Lain ninnau chanru nak cuanquex. Læx inc'a' yoquex chinpabankil chi anchal ech'ol, chi moco yoquex chintz'ektananquil. Us raj nak tinepab chi anchal ech'ol malaj ut tinetz'ektana raj chi junaj cua. Abanan læx chanchanex li ha' moco tik ta, chi moco que. Yal lulu ban. ¹⁶ Xban nak xcab rix ech'ol nak yoquex chinpabankil, laín texintz'ektana. Chanchan texinx'a'cua nak texintz'ektana. ¹⁷ Læx nequeye nak biomex ut cuan chixjunil li c'a'ru ere. Mac'a' napalto' ke chanquex. Abanan inc'a' nequeq'ue retal nak k'axal ra cuanquex. Chanchan neba'ex ut mutz'ex. Chanchan t'ust'uquex xban nak inc'a' niquinepab. K'axal tok'obal eru. ¹⁸ Jo'can nak ninye ere: Lok'omak e-oro cuiq'uin li ac numsinbil sa' xam ut isinbil xtz'ajnil. Lok'omak le saki t'icr cuiq'uin re tetikib erib ut inc'a' tec'ut exután nak t'ust'uquex. Lok'omak xbanol li xnak' eru

cuiq'uin re nak tex-ilok. ¹⁹ Li ani nequebinra, nintijeb ut nink'useb. Jo'can nak ninye ere nak jalomak ec'a'ux ut q'uehomak ech'ol chinpabanquil. ²⁰ Chanchan nak cuanquin chire li oquebal nak yoquin chebokbal. Li ani t_atabink re li cuatin ut tinixpab, lain tincuank riq'uin ut tocuank chi sum atin. ²¹ Li ani tixcuy xnumsinquil li raylal ut inc'a'tach'inank xch'ol, lain ting'ue chi c'ojlac chinc'atk sa' lin c'ojaribal jo' nak c'ojc'oquin chixc'atk lin Yucua' sa' lix c'ojaribal xban nak xincuy xnumsinquil li raylal. ²² Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel, chan li C'ajolbej reheb laj pabanel li cuanqueb Laodicea.

4

Lix lok'laj c'ojaribal li Dios cuan sa' choxa

¹ Ut chirix a'an quicuil jun chic li visión. Quicuil jun li oquebal teto sa' choxa. Ut quicuabi cui'chic li xyab li cux li quicuabi xben cua, chanchan xyab jun li trompeta nak yo chi atinac, ut quixye cue: —Taken chak arin ut tinc'utbesi chacuu li c'a'ak re ru tac'ulmank mokon, chan. ² Ut sa' li visión li quixc'utbesi chicuu li Dios riq'uin xuanquil li Santil Musik'ej, quicuil sa' choxa jun li lok'laj c'ojaribal. Ut quicuil nak cuan jun c'ojc'o sa' li c'ojaribal a'an. ³ Ut li ani chunchu sa' li c'ojaribal, c'ajo' lix lok'al. Li rilobal chanchan li chabil pec jaspe malaj ut chanchan li chabil pec cornalina li nalementz'un. Ut lix c'ojaribal sutsu riq'uin jun li xoquik'ab chanchan li chabil pec esmeralda nak quicuil. ⁴ Ut chi xjun sutam li lok'laj c'ojaribal cuanqueb cahib xca'cal chic li

c'ojaribal. Ut aran c'ojc'o queb li cahib xca'c'al li que'c'amoc chak be chiruheb laj pabanel. Sak li rak'eb ut cuanqueb xcorona oro sa' xjolomeb. ⁵ Ut sa' li lok'laj c'ojaribal nareploc li chanchan rak' cak ut lix yab li chokinc chanchan nak namok li cak. Chiru cuan cuukub li lampara lochlo retalil li Santil Musik'ej. ⁶ Ut quicuil ajcui' jun chanchan nebal cuan chiru li c'ojaribal. Nalemtz'un jo' li lem ut chanchan jun li palau sak sak ru. Chi xjun sutam li c'ojaribal cuanqueb cahib li yo'yo queb, chanchaneb ángel. Nabal li xnak' ruheb, jo' chiru jo' chirixeb. ⁷ Li xbén li chanchan ángel, a'an chanchan na-iloc jun li cakcoj; li xcab, a'an chanchan na-iloc jun li cuacax; li rox, a'an cuan xnak' ru chanchan ru jun cuink; ut li xca, a'an chanchan jun li nimla c'uch yo' chi xic'anc. ⁸ Cuan cuakitk xiq'ueb li junjunk. Nabal li xnak'eb ru cuan xca' pac'alil. Chi k'ek chi cutan yoqueb chixyebal: —Santo, santo, santo. Lok'oninbil taxak ru li Kacua' Dios li k'axal nim xcuanguard, li ac cuan ajcui' chak sa' xticlajic, li cuan anakcuán ut li cuank chi junelic. ⁹ Rajlal neque'xq'ue xlok'al ut neque'xnima ru ut neque'xbantioxi chiru li nimajcual Dios, li yo'yo chi junelic k'e cutan, li c'ojc'o sa' lix lok'laj c'ojaribal. ¹⁰ Eb li chanchaneb ángel yoqueb chi lok'oninc, ut li cahib xca'c'al chi aj c'amol be neque'xcuik'ib ribeb chiru li Kacua' Dios, li c'ojc'o sa' lix c'ojaribal ut que'xlok'oni xban nak yo'yo chi junelic k'e cutan ut que'xq'ue lix corona chiru lix c'ojaribal re xq'uebal xlok'al. ¹¹ Ut que'xye re: At Kacua', at kaDios, ac'ulub nak takaq'ue alok'al. Ac'ulub nak tanimak acuu ut taq'uehek' acuanquil xban nak laat catyiban re

chixjunil li c'a'ru cuan. Xban nak jo'can xacuaj laqat, jo'can nak xayo'obtesiheb li c'a'ru cuanqueb.

5

Li botbil hu ut li carner

¹ Ut sa' lix nim uk' li Dios li c'ojc'o sa' li lok'laj c'ojaribal quicuil jun li botbil hu tz'ibanol chi sa' ut chirix ut tz'apbil riq'uin cuukub li sello. ² Ut quicuil jun li ángel k'axal cau rib ut chi cau xyab xcux quixye: —¿Ani li xc'ulub risinquil li sello ut xtebal li hu? chan. ³ Xban nak moco xc'ulubeb ta, ma jun reheb sa' choxa, chi moco sa' ruchich'och', chi moco sa' xna'ajeb li camenak quiru xtebal li hu chi moco rilbal xsa' li hu. ⁴ Ut c'ajo' nak quinyabac chirilbal nak ma jun reheb xc'ulubeb xtebal li hu chi moco xc'ulubeb rilbal xsa'. ⁵ Ut jun reheb li chunchuqueb sa' li cahib xca'c'al chi c'ojaribal quixye cue: —Matyabac xban nak cuan jun taruk tixte li hu a'in. Cuan jun aj Judá chan chan li cakcoj. A'an xcomoneb li ralal xc'ajol li rey David. A'an xc'ulub risinquil li cuukub chi sello ut xc'ulub xtebal li hu xban nak a'an quixcuy xnum sinquil li ra xic', chan. ⁶ Quicuil Jun xakxo aran chiru li lok'laj c'ojaribal li sutsu xbaneb li cahib li chanchaneb ángel jo'queb ajcui' li cahib xca'c'al li c'ojc'o queb aran. Quic'utun nak li jun a'an ac camsinbil. Chanchan carner. Cuan cuukub xxucub ut cuan ajcui' cuukub xnak' ru retaliil li Santil Musik'ej li quitaklaciç sa' chixjunil li ruchich'och'. ⁷ Li Jun li chanchan carner quichal ut quixchap li botbil hu li cuan sa' xnim uk' li c'ojc'o sa' li lok'laj c'ojaribal. ⁸ Nak quixchap li botbil hu, li cahib li chanchaneb ángel ut li cahib xca'c'al li c'ojc'o queb

aran que'xcuik'ib ribeb chiru li Jun li chanchan carner. Cuanqueb x-arpa chi xjunkaleb ut cuanqueb xsec' yíbanbil riq'uin oro ut cuan li sununquil ban chi sa' retalil lix tijeb li ralal xc'ajol li Dios.

⁹ Que'xbicha jun li ac' bich ut que'xye: —Ac'ulub xchapbal li botbil hu ut xtebal li sello xban nak laat catcamsic. Riq'uin la quiq'uel xalok'eb nabal re nak te'oc chok' ralal xc'ajol li Dios. Yalak ani xacoleb a' yal ani xtepaleb xxe'tonil yucua'eb, ut a' yal bar xtenamiteb ut a' yal chanru li r̄atinobaleb.

¹⁰ Xaq'ueheb xcuانquil chi c'anjelac chiru li ka-Dios jo' aj tij, ut taq'ueheb ajcui' chi taklanc sa'ruchich'och'. — ¹¹ Ut sa' li visión quicuileb li q'ula ok'ob chi ángel li cuanqueb chi xjun sutam li lok'laj c'ojaribal ut li cahib li yo'yoqueb li chanchaneb ángel jo'queb ajcui' li cahib xca'c'al li c'ojc'oqueb aran. Quicuabi nak yoqueb chi atinac li q'ula ok'ob chi ángel. ¹² Que'xye chi cau xyab xcux:

—Li Jun li chanchan carner li quicamsic, a'an xc'ulub nak taq'uehek' xlok'al xban nak numtajenak xcuانquil, xbiomal, xna'leb, ut xcacuilal. Ut xc'ulub nak taq'uehek' xlok'al, tanimak ru ut talok'onik. — ¹³ Ut quicuabi ajcui' nak que'atinac chixjunil li c'a'ak re ru quiyo'obtesic xban li Dios, jo' li cuanqueb sa' choxa, jo' li cuanqueb sa'ruchich'och', jo' ajcui' li cuanqueb sa' li palau, jo'queb ajcui' li cuanqueb sa' xna'ajeb li camenak. Chixjunileb li que'yo'obtesic xban li Dios que'xye: —A' taxak li Dios li c'ojc'o sa' xc'ojaribal jo' ajcui' li Jun li chanchan carner, chilok'onik ut chiq'uehek' xlok'al. Chiq'uehek' xcuانquil ut chinimak ru chi junelic k'e cutan. — ¹⁴ Ut li cahib li yo'yoqueb li chanchaneb ángel, yoqueb chixyebal: —Jo'can

taxak.— Ut eb li cahib xca'c'al li c'ojc'oqueb aran que'xcuik'ib ribeb ut que'xlok'oni li yo'yo chi junelic k'e cutan.

6

Li cuukub chi sello

¹ Ut quicuil nak li Jun li chanchan carner quixte li xb'en sello. Ut quicuabi nak quiqtinac jun re-heb li cahib li chanchaneb ángel, li yo'yoqueb. Chanchan nak na-ec'an li cák nak quiqtinac chi cau xyab xcux. Quixye: —¡Quim! Cholacuil a'in, chan. ² Quicuil nak cuan jun li cacuay sak rix. Ut cuan jun li yo chi xic chirix cuan xtzimaj sa' ruk'. Ut quiq'uehe' jun lix corona ut co cui'chic chi numtac sa' xbenet li cuanqueb sa' ruchich'och'. ³ Ut li Jun li chanchan carner quixte jun chic li sello ut quicuabi li xcab li chanchan ángel nak quixye: —¡Quim! ¡Cholacuil a'in! chan. ⁴ Ut quiel chak jun chic li cacuay cak rix. Ut li jun li cuan chirix quiq'uehe' jun li nimla ch'ich' re ut quiq'uehe' xcuquil re tarisi li tuktuquil usilal sa' ruchich'och' re nak eb li cuink te'xamsi ribeb chi ribileb rib. ⁵ Ut nak li Jun li chanchan carner quixte li rox sello, quicuabi li rox li chanchan ángel yo chixyebal: —¡Quim! Cholacuil a'in, chan. Ut quicuil jun li cacuay k'ek rix. Ut li jun li cuan chirix cuan jun li bisleb sa' ruk'. ⁶ Ut quicuabi jun xyab cuux quiqtinac sa' xyank'eb li cahib li chanchaneb ángel ut quixye: —Naru xlok'bal cuib libra li trigo chiru li tojleb li re jun cutan ut naru xlok'bal cuakib libra li cebada chiru li tojleb li re jun cutan. Abanan meterk'usi xtz'ak li aceite ut li vino, chan. ⁷ Ut li Jun li chanchan carner quixte li xca sello ut

quicuabi nak li xcä li chanchan ángel quixye: — ¡Quim! Choläcuil a'in, chan. ⁸ Quicuil jun li cacuay k'an rix. Ut li cuan chirix li cacuay, a'an Camc xc'aba'. Ut li yo chi tákenc re, a'an Xna'aj Camenak xc'aba' xban nak a'an li tac'uluk reheb li te'camk. Li cuan chirix li cacuay quiq'uehe' xcuquil chix-camsinquil nabaleb sa' ruchich'och'. Jun jachal sa' xyänkeb li cahib jachal (1'4) chi cristian li cuan-queb sa' ruchich'och' te'camk. Cuan te'camsik riq'uin ch'ich'. Cuan te'camk xban cue'ej. Cuan te'camk xban yajel ut cuan ajcui' li te'camsik xban li josk' aj xul. ⁹ Nak li Jun li chanchan carner quixte li ro' sello, quicuil nak cuanqueb rubel li artal li que'camsic xban nak que'paban ut xban nak que'xch'olob xyälal li rätin li Dios. ¹⁰ Ut que'xye chi cau xyäb xcux: —At nimajcual Dios, laat Santo ut laat tjc äch'ol. ¿Jok'e tatrakok atin sa' xbeñeb li tenamit xban li raylal xe'xbänu ke? Ut, ¿jok'e taq'ue rekaj reheb nak xoe'xcamsi? chan-queb. ¹¹ Que'q'uehe' xsaki ak'eb. Ut que'yehe' reheb nak te'hilänk ut te'roybeni jarubak cutan chic toj tatz'aklok xq'uialeb li rech aj c'anjelil li toj te'camsik jo' nak que'camsic eb a'an. ¹² Ut quicuil nak li Jun li chanchan carner quixte li xcuak sello ut quicuan jun li nimla hic. Li sak'e quik'ojojino' ru. Chanchan li k'eki t'icr li neque'rocsí li raheb sa' xch'ol. Ut li po quicako' jo' li quic'. ¹³ Ut eb li chahim quilaje't'ane' chak chi ch'och' jo' nak nahire' ru li higo xban li cacuil ik' nak toj maji' nak'ano'. ¹⁴ Ut quisach li choxa nak quicuil. Chanchan jun li hu nak quixboti rib. Chixjunil li tzul jo' ajcui' li ch'och' li sutsu sa' ha' quilaje'ec'an sa' xna'ajeb. ¹⁵ Ut chixjunileb

quilaje'xmuk ribeb xbaneb xxiu. Que'xmuk ribeb li rey ut eb li cuanqueb xcuánquil, jo'queb ajcui' li neque'taklan sa' xbeneb li soldado. Que'xmuk ribeb li biom jo'queb ajcui' li cauheb rib, jo'queb ajcui' li lok'bil mos jo' ajcui' li mact'a'eb xpatrón. Que'xmuk ribeb sa' li ochoch pec ut sa' xyankeb li ninki pec li cuanqueb sa' tzul. ¹⁶ Ut que'xye reheb li tzul ut reheb ajcui' li pec: —T'anekex chak sa' kabən ut choemuk taxak chiru li c'ojc'o sa' lix lok'laj c'ojaribal. Choemuk chiru li Jun li chanchan carner, li yo xjosk'il sa' kabən. ¹⁷ Xcuulac xk'ehil li rakba atin sa' kabən. ¿Ani ta cui' taruk tixcol rib chiru a'an? chanqueb.

7

Li cahib xcuakxakc'al mil (144,000) laj Israel li q'uebileb retalil xban li Dios

¹ Ut chirix chixjunil a'in quicuil cahib li ángel xakxoqueb sa' xcā pac'alil li ruchich'och' li nachal cui' li ik'. Yoqueb chixk'usbal li ik' re nak inc'a' tanumek' chi cau sa' xben li ruchich'och' jo' ajcui' sa' xben li palau ut sa' xbeneb li che'. ² Ut quicuil jun chic li ángel yo chak chi chalc na-el cui' chak li sak'e. Cuan chak lix sello li yo'yoquil Dios riq'uin. Ut quiatinaç chi cau xyab xcux riq'uineb li cahib chi ángel li ac q'uebileb xcuánquil re xbanunquil raylal reheb li cuanqueb sa' ruchich'och', jo'queb ajcui' li cuanqueb sa' li palau. ³ Quixye reheb: —Mebanu raylal reheb li cuanqueb sa' ruchich'och' chi moco reheb li cuanqueb sa' li palau chi moco reheb li che'. Toj takaq'ue retalileb sa' xpequemeb riq'uin li sello eb laj c'anjel chiru li

Dios. ⁴ Ut quicuabi lix q'uialeb li que'q'uehe' retalileb sa' xpequemebe riq'uin li sello, a'an cahib xcuakxakc'äl mil (144,000) chi cristian. A'aneb li quiq'uehe' retalileb sa' xpequemebe sa' xyānkeb lix tēpaleb li ralal xc'ajol laj Israel. ⁵ Cablaju mil (12,000) li quiq'uehe' retalileb sa' xpequemebe sa' xyānkeb li ralal xc'ajol laj Judá; ut sa' xyānkeb li ralal xc'ajol laj Rubén, cablaju mil li quiq'uehe' retalileb sa' xpequemebe. Sa' xyānkeb li ralal xc'ajol laj Gad, cablaju mil li quiq'uehe' retalileb sa' xpequemebe. ⁶ Cablaju mil (12,000) li quiq'uehe' retalileb sa' xpequemebe sa' xyānkeb li ralal xc'ajol laj Aser; ut sa' xyānkeb li ralal xc'ajol laj Neftalí, cablaju mil li quiq'uehe' retalileb sa' xpequemebe. Ut sa' xyānkeb li ralal xc'ajol laj Manasés, cablaju mil li quiq'uehe' retalileb sa' xpequemebe. ⁷ Cablaju mil (12,000) li quiq'uehe' retalileb sa' xpequemebe sa' xyānkeb li ralal xc'ajol laj Simeón: ut sa' xyānkeb li ralal xc'ajol laj Leví, cablaju mil li quiq'uehe' retalileb sa' xpequemebe. Ut sa' xyānkeb li ralal xc'ajol laj Isacar, cablaju mil li quiq'uehe' retalileb sa' xpequemebe. ⁸ Cablaju mil (12,000) li quiq'uehe' retalileb sa' xpequemebe sa' xyānkeb li ralal xc'ajol laj Zabulón; ut sa' xyānkeb li ralal xc'ajol laj José, cablaju mil li quiq'uehe' retalileb sa' xpequemebe. Ut sa' xyānkeb li ralal xc'ajol laj Benjamín, cablaju mil li quiq'uehe' retalileb sa' xpequemebe.

Nabaleb li tenamit tikibabileb riq'uin saki ak'

⁹ Ut chirix a'an, quicuil ajcui' nabaleb chi tenamit xakxoqueb chiru li c'ojc'o sa' lix lok'laj c'ojaribäl ut chiru li Jun li chanchan carner. Inc'a'

naru rajlanquileb xban xq'ualeb. Cuanqueb aran
 a' yal ani xtepaleb xxe'tonil xyucua'eb ut a' yal bar
 xtenamiteb ut a' yal chanru li r̄atnobaleb. Tik-
 ibanbileb riq'uin saki ak' ut cuan chak sa' ruk'eb
 li ruk' che' palma. ¹⁰ Ut japjoqueb re chixyebal:
 —Li kacolbal riq'uin li Dios nachal chak, li c'ojc'o
 sa' lix lok'laj c'ojaribal, ut riq'uin ajcui' li Jun
 li chanchan carner.— ¹¹ Ut chixjunileb li ángel
 li cuanqueb chi xjun sutam li lok'laj c'ojaribal
 ut li cahib li chanchaneb ángel, jo'queb ajcui'
 li cahib xca'c'al li c'ojc'o queb aran, que'xciuk'ib
 ribeb chiru li lok'laj c'ojaribal ut que'xlok'oni li
 Dios. ¹² Ut que'xye: —Lok'oninbil taxak li ka-
 Dios. Chinimák taxak ru. Chiq'uehek' taxak
 xlok'al xban nak numtajenak xcuauquil, xna'leb
 ut xcacuial. Xc'ulub nak tobantioxink chiru chi
 junelic k'e cutan. Jo'can taxak. ¹³ Ut jun reheb li
 cahib xca'c'al li c'ojc'o queb aran quixpatz' cue: —
 ¿Aniheb a'in li tikibanbileb riq'uin saki ak'? ut ¿Bar
 xe'chal chak? ¹⁴ Ut laín quinchak'oc ut quinye re:
 —Kacua', laat nacatna'oc re. Ut a'an quixye cue: —
 A'aneb a'in li xe'cuyuc chak xnumsinquil li nimla
 raylal xe'xc'ul. A'aneb li cuybil sachbil lix maqueb
 xban nak quihoye' xquiq'uel li Jun li chanchan
 carner nak quicam sa' xc'aba'eb. ¹⁵ Jo'can ut
 nak cuanqueb chiru lix lok'laj c'ojaribal li Dios ut
 neque'c'anjelac chiru chi k'ek chi cutan sa' lix tem-
 plo. Ut li c'ojc'o sa' lix lok'laj c'ojaribal, a'an tajlok
 reheb xban nak a'an cuank riq'uineb. ¹⁶ Inc'a'
 chic te'tz'ocak chi moco tachakik reheb. Inc'a'
 chic te'xc'ul xtikcual li sak'e chi moco te'lubk xban
 tik. ¹⁷ Ut li Jun li chanchan carner li c'ojc'o aran
 sa' xyiheb li c'ojaribal, a'an tajlok reheb jo' jun li

chabil pastor narileb lix carner. Ut a'an taq'uehok re lix yu'ameb chi junelic. Inc'a' chic te'yabak xban nak li Dios tac'ojobank xch'oleb.—

8

Nak quitehe' li xcuuk li sello

¹ Nak quixte li xcuuk sello li Jun li chanchan carner, ma ani chic qui-ec'an sa' choxa. Mero or na ch'anamil que'cana. ² Ut quicuil cuukub li ángel xakxoqueb chiru li Dios. Ut que'q'uehe' cuukub li trompeta rebeb. ³ Quichal jun chic li ángel ut quixakli chiru li artal yibanbil riq'uin oro. Cuan chak sa' ruk' jun xna'aj li incienso yibanbil riq'uin oro. Quiq'uehe' nabal li incienso re, re tixc'at sa' li artal li cuan chiru li c'ojaribal, re nak cuotz tacuulak toj riq'uin li Kacua' rochben lix tijeb laj pabanel. ⁴ Ut lix sibel li incienso li cuan sa' ruk' li ángel quicuulac riq'uin li Dios rochben lix tijeb laj pabanel. ⁵ Ut li ángel quixchap li xna'aj li incienso ut quixnujobresi riq'uin li ru xam li cuan sa' li artal, ut quixcut sa' ruchich'och'. Nak quit'ane' sa' ruchich'och' naquilinac jo' nak namok li cak, ut nareploc li rak' cak ut quicuan ajcui' hic.

Li trompetas

⁶ Ut eb li cuukub chi ángel que'xcauresi ribeb chixyabasinquil li cuukub chi trompeta li cuan riq'uineb. ⁷ Li xben ángel quixyabasi lix trompeta. Ut quicute' sa' ruchich'och' sakbach ut xam junajinbil riq'uin quic'. Ca'ch'in chic ma jun jachal (1'3) li ruchich'och' quic'at. Ut que'c'at ajcui' li che'. Ca'ch'in chic ma jun jachal li che' que'c'at ut quic'at chixjunil li rax pim. ⁸ Ut li xcab ángel quixyabasi

lix trompeta. Chanchan jun li nimla tzul yo chi c'atc ut quicute' sa' li palau. Ca'ch'in chic mä jun jachal li palau quisuk'i chok' quic'. ⁹ Ut ca'ch'in chic mä jun jachal li xul li cuanqueb sa' li palau quilaje'cam. Ut ca'ch'in chic mä yijach li ninki jucub que'sache'. ¹⁰ Ut li rox ángel quixyabasi lix trompeta ut jun nimla chahim quit'ane' chak sa' choxa. Yo chi c'atc. Chanchan jun li chaj yo xxam-lel. Ca'ch'in chic mä yijach li nima' ut ca'ch'in chic mä yijach li yu'am ha' li quinak cui'. ¹¹ Li chahim a'an, C'a xc'aba'. Ca'ch'in chic mä yijach li ha' quic'aho' ut nabaleb li tenamit que'cam xban nak que'ruc' li c'ahil ha'. ¹² Ut li xcä ángel quixyabasi li trompeta ut ca'ch'in chic mä yijach (1'3) li sak'e inc'a' chic quicutano' ru. Ut ca'ch'in chic mä yijach li po inc'a' chic quicutano' ru. Ut ca'ch'in chic mä yijach li chahim inc'a' chic que'lemtz'un. Ca'ch'in chic mä yijach li cutan quik'ojoyino' ru. Ut jo'can ajcui' li po chiru li k'ojoyin. Ca'ch'in chic mä yijach li k'ojoyin inc'a' quicutano' ru. ¹³ Ut quicuil jun chanchan nimla c'uch yo chi rupupic chiru choxa, ut yo chixjapbal re chixyebal: —C'ajo' li raylal, c'ajo' li raylal. C'ajo' li raylal li tachalk sa' xbeneb li cuanqueb sa' ruchich'och' nak te'yabasik li oxib chic chi trompeta xbaneb li oxib chi ángel, chan.

9

¹ Ut li ro' ángel quixyabasi lix trompeta ut quicuil nak jun li chahim quit'ane' chak sa' choxa ut quinak sa' ruchich'och'. Ut quiq'uehe' re li chahim lix lacuil li chamal jul nak quicuil. ² Nak quixte li re li chamal jul, c'ajo' li sib qui-el chak. Chanchan li sib li na-el sa' junak nimla horno.

Quik'ojyino' ru li sak'e ut li ik' xban li sib li qui-el chak sa' li chamal jul. ³ Sa' li sib a'an que'el chak nabaleb li xul chanchaneb laj sac' ut que'xjeq'ui ribeb sa' ruchich'och'. Que'q'uehe' xcuanquil re nak te'ti'ok. Lix may li te'xtiu, a'an chanchan xmay li neque'xtiu laj xoc'. ⁴ Que'yehe' reheb nak inc'a' te'xch'e' li pim chi moco li acuimk sa' ruchich'och', chi moco junak che'. Ca'aj cui' eb li cristian li mac'a' retalileb sa' xpequemeb xban li Dios, ca'aj cui' eb a'an li te'ti'ek'. ⁵ Ut que'yehe' ajcui' reheb nak inc'a' te'xcamsi li cristian. Ca'aj cui' te'xrahobtesiheb chiru qb po. Ut lix rahil li te'xtiu li xul a'an, chanchan xmay naxtiu laj xoc'. ⁶ Sa' eb li cutan a'an, eb li cristian te'xsic' raj xcamiqueb xban li raylal yokeb chixc'ulbal. Te'xra raj ru cämc, abanan inc'a' te'cämk. ⁷ Eb laj sac' chanchaneb li cacuay ac cauresinbileb chi pletic. Chanchan cuanqueb xcorona yibanbil riq'uin oro sa' xjolomeb. Ut li rilobaleb chanchan rilobaleb cuink. ⁸ Li rismal xjolomeb chanchan rismal xjolomeb ixf ut li ruch reheb, chanchan ruch reheb cakcoj. ⁹ Chanchan ch'ich' cuan chire xch'oleb re xcolbaleb rib. Ut lix xiq'ueb neque'ec'an jo' neque'ec'an q'uila carruaje quelonbil xban cacuay nak ac yoqueb chi xic chi pletic. ¹⁰ Eb li xul a'an cuanqueb xmay sa' ru'ujeb xye. Ut riq'uin lix ye neque'ti'oc jo' laj xoc'. Ut riq'uineb lix ye te'xrahobtesiheb li tenamit chiru qb po. ¹¹ Cuan jun li nataklan sa' xbeneb. A'an li ángel li k'axal nim xcuanquil chi taklanc sa' li chamal jul. Aj Abadón xc'aba' sa' li atinobal hebreo, ut sa' griego aj Apolión xc'aba'. (Chi jalbil ru li c'aba'ej a'in naraj naxye

“aj sachonel”.) ¹² A'in li xben raylal li quic'ulman nak quicuil. Abanan toj cuan cuib chic li raylal li te'chalk sa' xbeneb li tenamit. ¹³ Li xcuak ángel quixyabasi lix trompeta ut quicuabi jun xyab cuc quiatinac chak sa' xyankeb li cahib chi xucub li cuanqueb sa' xcä xucutil li artal li yibanbil riq'uin oro, li cuan chiru li Dios. ¹⁴ Quixye re li xcuak ángel li cuan xtrompeta riq'uin: —Hiteb li cahib chi ángel li bac'boqueb chire li nima' Eufrates, chan. ¹⁵ Que'ach'abac li cahib chi ángel li ac xakabanbileb re li honal a'an ut re li cutan a'an ut re li po a'an ut re li chihab a'an re nak te'xic xcamsinquileb nabaleb li cristian. Ca'ch'in chic ma yijach li cristian li te'camsik. ¹⁶ Lain quicuabi jo' q'uialeb li soldado li te'xic chi petic chirix cacuay. Cuib ciento millón (200,000,000) lix q'uialeb. ¹⁷ Jo'ca'in nak que'cuil sa' li visión eb li cacuay ut eb li yoqueb chi xic chirix. Eb li yoqueb chi xic chirix li cacuay cuanqueb xcolbal li re xch'oleb. Chanchan xcakal li xam, chanchan xraxil li chabil pec zafiro ut chanchan xk'anal li azufre. Lix jolomeb li cacuay chanchan lix jolomeb li cakcoj. Ut sa' reheb yo chi elc xam, sib ut azufre. ¹⁸ Xban li oxib chi raylal a'in ca'ch'in chic ma yijach li cristian que'camsic. Nabaleb li cristian que'camsic xban li xam, li sib ut li azufre li qui-el chak sa' reheb li cacuay. ¹⁹ Sa' reheb cuanqueb xmay ut cuanqueb ajcui' sa' ru'ujeb xye. Lix yeheb chanchan xjolomeb li c'anti' ut riq'uin a'an neque'xrahobtesiheb li cristian. ²⁰ Ut li jo' q'uial chic li cristian li inc'a' que'camsic xban li raylal a'an inc'a' ajcui' que'yot'e' xch'oleb ut inc'a' que'xcanab xbənunquil li məusilal. Inc'a'

que'xcanab xlok'oninquil li m^aus aj musik'ej chi moco que'xcanab xlok'oninquileb li jalani^l dios yⁱbanbil riq'uin oro, plata, k'an ch'ich' bronce jo' ajcui' riq'uin pec ut che'. Inc'a' que'xcanab xlok'oninquileb li yⁱbanbil dios a'in, li inc'a' neque'i^loc, chi moco neque'abin, chi moco neque'b^ec. ²¹ Inc'a' que'xjal xc'a'uxeb chi moco que'yot'e' xch'oleb xban nak inc'a' que'xcanab xcamsinquel ras ritz'ineb ut inc'a' que'xcanab li tulac, chi moco que'xcanab li co'b^etac yumbetac ut inc'a' ajcui' que'xcanab li elk'ac.

10

Li ch'ina botbil hu li cuan riq'uin li ángel

¹ Quicuil nak quichal jun chic li ángel cau rib. Yo chak chi cubec sa' choxa sutsu sa' chok. Ut lix jolom sutsu xban jun li xoquik'ab. Li rilobal nalementz'un jo'li sak'e ut li rok chanchan jun okech yo xxamlel. ² Cuan chak sa' ruk' jun li ch'ina hu teto. Lix nim ok quixxakab sa' xben li palau ut lix tz'e ok quixxakab sa' xben li ruchich'och'. ³ Ut quixjap re chi cau xy^ab xcux chanchan nak naxjap re li cakcoj. Ut qui-abjc cuukub xy^ab cucx chanchan c^ak nak que'ec'an. ⁴ Oc raj cue chixtz'ib^anquil retalil li c'a'ru que'xye li chanchan cuukub chi c^ak. Abanan quicuabi jun quiat^atinac sa' choxa ut quixye cue: —Matz'iba li c'a'ru xe'xye li cuukub chi xy^ab cucx chanchan c^ak. Li c'a'ru xacuabi m^a bar taye resil. Xocxok ban sa' ach'ol, chan. ⁵ Ut li ángel li quicuil xakxo sa' xben li palau ut sa' xben li ruchich'och', quixtaksi lix nim uk', ⁶ ut quixba^anu li juramento sa' xc'aba' li Jun

li yo'yo chi junelic, li quiyo'obtesin re li choxa jo' ajcui' li ruchich'och' ut chixjunil li cuan chiru, jo' ajcui' li palau ut chixjunil li cuan chi sa'. Quixye nak ac xcuulac xk'ehil. Inc'a' chic t̄abayk. ⁷ Nak tixyābasilix trompeta li xcuuk ángel, sa'eb li cutan a'an t̄atz'aklok ru lix c'a'ux li Dios, li mukmu nak quicuan. T̄atz'aklok ru jo' quixye reheb li profeta li que'c'anjelac chiru, chan. ⁸ Ut li jun li quiātinac cuiq'uin sa'choxa, quixye cui'chic cue: —Ayu. C'ul li hu li teto, li cuan sa' ruk' li ángel, li xakxo sa' xben li palau ut sa' xben li ruchich'och'.— ⁹ Lain coin riq'uin li ángel ut quinye re nak tixq'ue cue li ch'ina hu. Ut a'an quixye cue: —Cue'. Chap li hu ut t̄anuk'. Sa'  cue qui'ak jo' xqui'al lix ya'al cab, abanan c'ahak sa' la sa', chan cue. ¹⁰ Quinc'ul li ch'ina hu sa' ruk' li ángel ut quinnuk'. Nak cuan sa' cue chanchan xqui'al li xya'al cab. Ut nak ac xinnuk' quic'aho' sa' lin sa' xban. ¹¹ Quixye cue: —Tenebanbil sa'  ben laat xyebal resil li c'a'ru tac'ulmank. Toj taye cui'chic resil c'a'ru te'xc'ul eb li tenamit, jo' ajcui' li xninkal ru tenamit jo' ajcui' lix reyeb. Taye ajcui' resil li c'a'ru te'xc'ul sa' eb li tenamit li jalan jalank ratinobaleb.

11

Li cuib chi cuink li te'yehok resil li c'a'ru tac'ulmank

¹ Ut quiq'uehe' cue jun li che' re bisoc ut quiyehe' cue: —Ayu, bis chak lix templo li Dios jo' ajcui' li artal ut tacuajlaheb jarubeb li cristian li neque'lok'onin aran. ² Abanan m abis li nebal li cuan chiru lix templo li Dios xban nak a'an

k'axtesinbil reheb li macua'eb aj judío. Eb a'an te'xmux ru li santil tenamit chiru oxib chihab riq'uin media (42 po). ³ Lain tintaklaheb cuib aj c'anjel chicuu. Cuank rak'eb chirix k'es ru retalil li rahil ch'olej. Eb a'an te'xye cuesilal chiru oxib chihab riq'uin cuakib po.— ⁴ Chiru li Kacua'li cuib chi cuink a'in chanchanakeb li cuib chi che' olivo ut chanchanakeb li cuib chi candelero li cuanqueb chiru li Dios, laj echal re li ruchich'och'. (Zac. 4:3, 11, 14) ⁵ Ut cui ani taajok xrahobtesinquileb, chanchan xam li taelk sa' reheb li cuib chi cuink xban nak yal riq'uin li ratineb te'camk li xic' neque'ilok reheb. Jo'ca'in nak te'camk li ani te'ajok re xrahobtesinquileb li cuib chi cuink a'in. ⁶ Eb li cuib chi cuink a'in q'uebileb xcuانquil chixbanunquil re nak inc'a' tixq'ue li hab chiruheb li cutan nak yokeb chixyebal li c'a'ru tac'ulmank. Ut cuanqueb xcuانquil re xsuk'isinquil li ha' chok' quic' ut cuanqueb ajcui' xcuانquil re xrahobtesinquileb li cuanqueb sa' ruchich'och' riq'uin chixjunil li raylal a' yal jarub sut te'raj xbanunquil. ⁷ Nak acak xe'rake' xyebal resilal li c'a'ru tac'ulmank, jun li chanchan josk' aj xul taelk chak sa' li chamal jul ut tapletik riq'uineb a'an. Tanumtak sa' xbeneb toj retal tixcamsiheb. ⁸ Li camenak te'canak chi t'ant'o sa' eb li be re li nimla tenamit bar quicamsic cui' chiru cruz li Kacua' Jesucristo. Cuan nak neque'xjuntak'eta li tenamit a'an riq'uineb li tenamit Sodoma ut Egipto xban li mausilal que'xbanu. ⁹ Oxib cutan riq'uin jun cua'leb te'cuank aran chi t'ant'o li camenak ut inc'a' te'q'uehek' chi mukec'. Ut yalak ani te'ilok reheb, a' yal ani xtepaleb lix xe'tonil yucua'eb, ut a' yal bar xtenamiteb, ut a'

yal chanru li r̄atinobaleb. **10** Ut li cuanqueb sa' ruchich'och' t̄asahok' sa' xch'oleb nak te'c̄amk li cuib chi cuink ut tac'ojlak xch'oleb. Jo'can nak te'oc chixsihinquil c'a'ru reheb chi ribileb rib. Tasahok' xch'oleb nak te'c̄amk li cuib chi cuink xban nak ch'a'aj que'rec'a nak que'yehe' reheb nak t̄achalk raylal sa' xbeneb. **11** Ut quicuil ajcui' nak ac xnume' li oxib cutan riq'uin jun cua'leb, que'yo'obtesic cui'chic li cuib chi cuink xban li Dios ut que'xakli cui'chic chi yo'yo chiruheb li tenamit. Ut c'ajo' nak qui-oc xxiuheb li que'iloc reheb. **12** Ut li cuib chi cuink que'rabi jun yo' chi ̄atinac sa' choxa. Chi cau xyab xcux quixye reheb: —Takenkex chak arin, chan. Ut que'take' sa' choxa sa' jun li chok chiruheb li xic' neque'iloc reheb. **13** Ut sa' li honal a'an quicuan jun nimla hic ut li xlaje jachalal li tenamit qui-uk'e'. Cuukub mil (7,000) xq'ual li cristian que'cam xban li hic. Ut li jo' q'ual chic inc'a' que'cam, que'xucuac ut que'xq'ue xlok'al li Dios cuan sa' choxa. **14** A'in li xcab li raylal ac xnume'. Abanan toj cuan jun chic li raylal t̄achalk chi seb sa' xbeneb.

Nak quiyabasic li xcuuk li trompeta

15 Ut li xcuuk ángel quixyabasi lix trompeta. Ut qui-abic nabal li xyab cux sa' choxa. Yoqueb chixyebal chi cau: —Anakcuan te'canak rubel xcuانquil li Kacua' chixjunileb li cuanqueb sa' ruchich'och'. A' chic li Kacua' Dios ut li Cristo te'taklank sa' xbeneb chixjunileb chi junelic k'e cutan, chanqueb. **16** Ut eb li cahib xca'c'al li c'ojo'queb sa' lix c'ojaribal que'xciik'ib

ribeb ut que'xlok'oni li Dios. ¹⁷ Ut que'xye: — At Kacula', at nimajcual Dios, nocobantioxin chacula. Laat li ac cuancat ajcui' chak junxil ut cuancat anakuan ut cuankat chi junelic. Laat cuan acuanquil chi junelic ut laat chic tattaklank sa' xbeneb chixjunileb li cuanqueb sa' ruchich'och'. ¹⁸ C'ajo' nak que'josk'o' li tenamit li xic' neque'iloc acue. Abanan xcuulac xk'ehil nak tac'ut laj josk'il chiruheb. Xcuulac xk'ehil nak tatrakok qatin sa' xbeneb li camenak. Ut taq'ueheb xk'ajcamunquileb laj c'anjal chacula li que'yehoc resil li c'a'ru tac'ulmank. Ut taq'ueheb ajcui' xk'ajcamunquileb laj pabanel li que'q'uehoc alok'al, usta cuanqueb xcuanguil usta mac'a'. Ut laat tasach ruheb li que'bannun raylal reheb li cuanqueb sa' ruchich'och', chanqueb. ¹⁹ Ut quicuil nak quitehe' lix templo li Dios cuan sa' choxa. Ut quic'utun li Lok'laj Cax li cuan cui' li contrato sa' lix templo li Dios. Nareploc li rak' cak ut nabal li chokinc. Quicuan jun li hic ut nabal li sakbach quit'ane' nak quicuil.

12

Li ixf ut li josk' aj xul dragón xc'aba'

¹ Ut quicuil jun li sachba ch'olej sa' choxa. Quicuil jun li ixf. Nalemtz'un li rak' jo' nalemtz'un li sak'e. Li po cuan rubel rok ut cuan jun corona sa' xjolom ut chiru li corona cuan cablaju li chahim. ² Li ixf a'an yaj aj ixf. Ac oc re chi q'uirac. Yo chixjapbal re xban lix raylal. ³ Ut jun chic sachba ch'olej quic'utbesic chicuu sa' choxa. Quicuil jun nimla josk' aj xul cak rix dragón xc'aba'. Cuan

cuukub lix jolom ut lajeb lix xucub. Ut sa' eb
 lix jolom cuukub cuan junjunk lix corona. ⁴ Ut
 riq'uin lix ye yo chixquelonquil nabal li chahim
 chiru choxa. Ca'ch'in chic ma yijach li chahim
 li yo chixquelonquil. Ut quixcut sa' ruchich'och'
 li chahim. Li nimla josk' aj xul quixakli chiru li
 ixt li oc re chi q'uirac re nak tixnuk' li c'ula'al
 nak tayo'lak. ⁵ Quiyo'la lix c'ula'al li ixt ch'ina
 telom. Ut a'an chic tataklank sa' xbeneb li cuan-
 queb sa' ruchich'och'. Chanchan riq'uin li xuk'
 ch'ich' taataklañk sa' xbeneb xban nak a'anak chic
 li yal re sa' xbeneb. Li c'ula'al quisapuc ut
 quic'ame' riq'uin li Dios bar c'ojo'c' cui' sa' lix
 lok'laj c'ojaribal. ⁶ Li ixt quiélelic ut co sa' li
 chaki ch'och' bar mac'a' cuan sa' li na'ajej ac cau-
 resinbil chok' re xban li Dios. Ut aran tach'olonik
 xban li Dios chiru oxib chihab riq'uin cuakib po
 (1,260 cutan). ⁷ Chirix a'an quicuan jun nimla
 plet sa' choxa ut li ángel Miguel rochbeneb li ángel
 li neque'taken re que'pletec riq'uin li josk' aj xul
 dragón. Ut eb li ángel li neque'taken re li dragón
 que'xtenk'a a'an chi pletec. ⁸ Inc'a' que'xcuy pletec
 li dragón ut inc'a' chic que'q'uehe' xna'ajeb sa'
 choxa. ⁹ Quicute' sa' ruchich'och' xban li Dios li
 josk' aj dragón. Li dragón, a'an li c'anti' li ac cuan
 ajcui' chak najter. A'an laj tza li nabalak'in rehreb
 li cuanqueb sa' ruchich'och'. Satanás nayeman
 re. Quicute' sa' ruchich'och' laj tza ut que'cute'
 ajcui' li ángel li que'taken re. ¹⁰ Ut quicuabi jun
 xyab cuux yo chi atinac chi cau sa' choxa ut quixye:
 —Anakcuán xc'ulun chak li kacolbal. Anakcuán
 li Kacua' chic taçuank xcuánquil ut a'an chic
 tataklank. Quic'utun lix cuanquinal li Cristo nak

qui-isic sa' choxa laj tza li quijitoc reheb li kech aj pābanelil chiru li Dios chi k'ek chi cutan. ¹¹ Eb li kech aj pābanelil xe'numta sa' xbēn laj tza sa' xc'aba' lix quiq'uel li Jun li chanchan carner ut xban nak que'xch'olob xyālal nak a'an laj Colol reheb. Inc'a' que'xra xyu'ameb, toj retal que'xc'ul cāmc. ¹² Jo'can nak chisahok' taxak sa' ech'ol lāex li cuanquex sa' choxa. Abanan li cuanqueb sa' ruchich'och' ut sa' li palau tok'obeb ru xban nak laj tza quicute' sa' ruchich'och' chi cuānc riq'uineb. C'ajo' lix josk'il xban nak naxnau nak cuulac re xk'ehil nak tasachek' ru, chan. ¹³ Ut li josk' aj dragón quixq'ue retal nak quicute' sa' ruchich'och'. Qui-oc xtakenquil li ixt li quiyo'la jun xc'ula'al tēlom. ¹⁴ Quiq'uehe' cuib lix xic' li ixt re tārupupik chanchan xxic' li nimla c'uch re nak tāe'lelik ut tāxic toj sa' li chaki ch'och' sa' li na'ajej ac cauresinbil chok' re bar māc'a' cuan. Ut aran tāch'olonik xban li Dios chiru oxib chihab riq'uin cuakib po. Ut aran tixmuk rib chiru li c'anti'. ¹⁵ Ut li c'anti' quixxa'cua' ha' chirix li ixt. Ut li quixxa'cua' chanchan jun nima're nak tāc'amék' xban li rok li nima' li ixt. ¹⁶ Li ixt quitenk'ac xban li ch'och'. Quixte rib li ch'och' ut quixtz'ub li ha' li quixxa'cua' li josk' aj dragón. ¹⁷⁻¹⁸ C'ajo' nak quijosk'o' li dragón sa' xbēn li ixt. Co chi pletic riq'uineb li ralal xc'ajol, li jo' q'uijal chic que'cana. A'aneb li neque'bānun re li xyałal li quixch'olob li Jesucristo.

Lijosk' aj xul li qui-el chak sa' li palau

¹ Ut li dragón quixakli chire li palau ut quicuil nak qui-el chak sa' li palau jun chic chanchan josk' aj xul cuan cuukub xjolom ut lajeb lix xu-cub. Ut sa' li lajeb chi xucub cuan junjunk lix corona. Ut tz'ibabil sa' eb lix jolom jun li c'aba'ej re xmajecuanquil li Kacula'. ² Li josk' aj xul li quicuil, a'an chanchan hix. Eb li rok chanchan rok li xul oso. Ut li ruch re chanchan ruch re li cakcoj. Ut li dragón quixq'ue lix cacuial ut lix c'ojaribal re li josk' aj xul. Ut quixq'ue ajcui' xcuانquil. ³ Ut quicuil nak jun reheb lix jolom li josk' aj xul yoc'ol ut chanchan cämre. Abanan quiq'uira. Sachso xch'oleb li tenamit que'cana chirilbal nak quiq'uira. Ut que'xtake li josk' aj xul. ⁴ Ut que'xq'ue xlok'al li dragón xban nak quixq'ue xcuانquil li josk' aj xul. Ut que'xlok'oni ajcui' li josk' aj xul ut que'xye: —¿Ani ta cui' cuan xcuانquil jo' li josk' aj xul a'in? Ma ani tixcuy pletic riq'uin a'an xban nak quiq'uehe' xcuانquil xban li dragón, chanqueb. ⁵ Ut quiq'uehe' xcuانquil li josk' aj xul chi atinac ut chixbañunquil li c'aaru taraj. K'axal k'etk'et li xul ut yo chixmajecuanquil li Dios. Sachba ch'olej quixbañu chiru oxib chihab riq'uin cuakib po. ⁶ Ut li josk' aj xul quixmajecua li Dios ut quixmajecua ajcui' lix santil na'aj. Ut quixmajecua li cuanqueb sa' choxa. ⁷ Quiq'uehe' xcuانquil chi pletic riq'uinleb li ralal xc'ajol li Dios ut quinumta sa' xbeneb. Quiq'uehe' xcuانquil sa' xbeneb chixjunileb, a' yal ani xtépaleb lix xe'tonil yucua'eb, ut a' yal bar xtenamiteb ut a' yal chanru li rätinobaleb. ⁸ Ut chixjunileb li cuanqueb sa' ruchich'och' te'xlok'oni ru li josk' aj xul a'an.

Te'xlok'oni li xul chixjunileb li inc'a' tz'ibabileb xc'aba' sa' li hu li tz'ibabil cui' xc'aba'eb li cuanqueb xyu'am chi junelic, li cuan riq'uin li Jun li chanchan carner, li ac xakababil chak re camsic sa' xticlajic li ruchich'och'. ⁹ Li ani t̄raj xtaubal ru li xyalal, chixq'uehak retal a'in: ¹⁰ Li ani tento taxic chi prexil, xicak chi prexil. Ut li ani tento tacamsik riq'uin ch'ich', chicamsik riq'uin ch'ich'. Jo'can nak cauhakeb taxak xch'oleb li ralal xc'ajol li Dios. Te'xcuy taxak xnumsinquil li raylal ut inc'a' ta chich'inank xch'oleb.

Lijosk' aj xul li qui-el chak sa' ch'och'

¹¹ Ut chirix a'an quicuil jun chic li josk' aj xul qui-el chak sa' ch'och'. Cuan cuib lix coc' xucub chanchan lix xucub li carner. Ut naqtinac jo' naqtinac li dragón. ¹² Li xul a'an cuan xcuanquil jo' li josk' aj xul li quiyoq'ue' jun xjolom ut quicam raj abanan quiq'uira. Ut chiru ajcui' a'an naxmin ruheb chixjunileb li cuanqueb sa' ruchich'och' re nak te'xlok'oni li josk' aj xul. ¹³ Li xcab josk' aj xul quixbanu sachba ch'olej. Naxcubsi chak xam sa' choxa toj sa' ruchich'och' yal re nak eb li cristian te'ril. ¹⁴ Quixbalak'iheb li cuanqueb sa' ruchich'och' riq'uin li sachba ch'olej li quiq'uehe' re xb̄anunquil chiru li josk' aj xul. Ut quixye reheb li cuanqueb sa' ruchich'och' nak te'xyib jun xjalam ̄uch li josk' aj xul li quiyoq'ue' riq'uin ch'ich' ut quiq'uira. ¹⁵ Ut li xcab xul quiq'uehe' xcuanquil re nak tixq'ue xmusik' lix jalam ̄uch li xb̄en josk' aj xul re taqtinak ut tixq'ue chi c̄amc li ani inc'a' taq'uehok xlok'al. ¹⁶ Quixpuersi ruheb chixjunileb re nak te'xc'ul li retalileb sa' lix nim uk' malaj

sa' xpequemeb. Que'q'uehe' retalileb chixjunileb li cuanqueb xcuانquil jo' ajcui' li mact'a'eb xcuانquil, eb li biom jo' eb ajcui' li neba', eb li lok'bil mos jo' ajcui' li mact'a'eb xpatrón. ¹⁷ Cui mact'a' li retalileb sa' xnim uk' malaj sa' xpequemeb, inc'a' taruk te'lok'ok chi moco taruk te'c'ayink. Li retalil li te'q'uehek', a'an xc'aba' li josk' aj xul. Lix c'aba' a'an, a'an ajcui' jun li número. ¹⁸ A'in naraj nak cuانk xna'leb li ani tailok re. Li ani cuan xna'leb naru tixsic' c'a'ru xyالal. Naru tarajla lix letril lix c'aba' li josk' aj xul ut taelk lix número jun li cuink. Li número a'an cuakib ciento riq'uin cuakib xcac'al (666).

14

Li cahib xcuakxakc'äl mil (144,000) yoqueb chi bichanc re xlok'oninquil li Kacua'

¹ Ut quin-iloc cui'chic ut quicuil nak aran sa' xb'en li tzul Sión xakxo li Jun li chanchan carner. Ut rochben a'an cuanqueb cahib xcuakxakc'äl mil (144,000) chi cristian. Sa' xpequemeb tz'ibanol lix c'aba' li Jun li chanchan carner ut tz'ibanol ajcui' xc'aba' lix Yucua'. ² Ut quicuabi jun yo chi ątinac sa' choxa chanchan xyab lix cau ok li nima'. Chanchan nak namok li cak. Ut chanchan xyabeb li arpa nak yoqueb xch'e'bal. ³ Quicuabi nak yoqueb chixbichanquil jun li ac' bich chiru li c'ojc'o sa' li lok'laj c'ojaribal, chiruheb li cahib li chanchaneb ángel li yo'yoqueb, ut chiruheb li cahib xca'c'äl li c'ojc'o queb sa' xc'ojaribaleb. Ma ani chic que'ru xtzolbal li bich a'in. Ca'aj cui' eb li cahib xcuakxakc'äl mil (144,000) li que'cole' sa' xyankeb li cuanqueb sa' ruchich'och'. ⁴ A'aneb

a'in li que'pában re li Jun li chanchan carner, li que'taken re yalak bar, li inc'a' que'xmux ribeb riq'uin ixt'chi inc'a' sumsuqueb. A'ineb li xben que'cole' sa' xyānkeb li cuanqueb sa' ruchich'och' re nak te'oc chok' ralal xc'ajol li Dios ut chok' ralal xc'ajol li Jun li chanchan carner. ⁵ Inc'a' que'tic'ti'ic. Chiru li Dios māc'a' xmaqueb.

Li oxib chi ángel

⁶ Ut quicuil jun chic li ángel yo chi rupupic chiru choxa. Yo chixyebal jun esilal li māc'a' roso'jic rebeb chixjunileb li cuanqueb sa' ruchich'och' a' yal ani xtepaleb lix xe'tonil yucua'eb, ut a' yal bar xtenamiteb ut a' yal chanru li ratinobaleb. ⁷ Yo chixyebal chi cau xyāb xcux: —Chexucuāk ru li Dios ut cheq'ue xlok'al xban nak xcuulac xk'ehil nak tārakok atin sa' xbeneb li cuanqueb sa' ruchich'och'. Chelok'onihak a'an li quiyiban re li choxa, li ruchich'och', ut li palau jo'queb ajcui' li yu'am ha', chan. ⁸ Jun chic li ángel yo chi takenc re ut yo chixyebal: —Ac xsache' xcuauquil li nimla tenamit Babilonia. Ac xsache' ru li tenamit. A'an li quic'amoc xbeheb chixjunileb li tenamit chi mācōbc. Chanchan nak quixcaltesiheb nak quixq'ueheb chixbānunquil li māusilal, chan. ⁹ Ut quicuil li rox ángel, yo chixtakenquil li cuib chic. Li jun a'in yo chixyebal chi cau xyāb xcux: —Li ani tixlok'oni li josk' aj xul malaj ut lix jalām uch, ut tixc'ul li retalil sa' xpequem malaj chi ruk', ¹⁰ a'an tixc'ul nabal li raylal nak li Dios tārakok atin sa' xbeneb riq'uin xjosk'il. Chiruheb li santil ángel ut chiru li Jun li chanchan carner tārahobtesik

riq'uin azufre yo xxamlel nak taq'uehek' chixtojbal rix lix mac. ¹¹ Junelic k'e cutan yokeb chi c'uluc raylal li neque'xlok'oni li josk' aj xul malaj ut lix jalal uch, li que'xc'ul li retalil lix c'aba'sa' xpequemeb malaj chi ruk'eb. Chi k'ek chi cutan yokeb chi c'uluc raylal, chan. ¹² Jo'can nak cauhakeb taxak xch'oleb li ralal xc'ajol li Dios, eb li neque'banun re lix chak'rab li Dios ut neque'paban sa' xc'aba' li Jesucristo. Inc'a' taxak tach'inank xch'oleb sa' xpabaleb. ¹³ Ut quicuabi jun yo chi atinac sa' choxa ut quixye cue: — Tz'iba li atin a'in: Chalen anakcuan us xak reheb li neque'cam, li ac xe'xpab li Kacua'. Yal. Us xak reheb, chan li Santil Musik'ej, xban nak te'hilank chixbanunquil li chabil c'anjal li ac xe'xbanu ut te'xc'ul xk'ajcamunquil.—

Nak quirake' atin sa' xbeneb li cuanqueb sa' ruchich'och'

¹⁴ Ut quicuil jun li saki chok. Ut sa' li chok a'an, chunchu li Jun chanchan cuink. A'an li C'ajolbej. Ut sa' xjolom cuan jun li corona yibambil riq'uin oro ut sa' ruk' cuan jun li k'esnal ch'ich' c'onc'o. ¹⁵ Ut jun chic li ángel qui-el chak sa' xtemplo li Dios. Yo chi atinac riq'uin li Jun li c'ojc'o sa' xben li chok ut quixye re chi cau xyab xcux: —Tiquib xyoc'bal li acuimk sa' ruchich'och'. Ac xcuulac xk'ehil xxocbal li ru li acuimk xban nak ac xk'ano', chan. ¹⁶ Ut li c'ojc'o sa' li chok quixtiquib xyoc'bal li acuimk sa' ruchich'och' ut quixxoc li ru. ¹⁷ Ut jun chic li ángel qui-el sa' xtemplo li Dios, li cuan sa' choxa. Cuan ajcui' sa' ruk' a'an jun li k'esnal ch'ich'. ¹⁸ Ut jun chic li ángel qui-el cuan cui' li

ortal. A'an li qui-iloc re li xam li naq'ueman sa' xben li artal. Quiatinac riq'uin li ángel li cuan xk'esnal ch'ich' sa' ruk' ut quixye re chi cau xyab xcux: —Taset chi ct riq'uin la k'esnal ch'ich' li ru li uva li cuanqueb sa' ruchich'och' xban nak ac xk'ano', chan. ¹⁹ Ut li ángel quixyoc' li ru li uva li cuan sa' ruchich'och'. Ut quixcut sa' li nimla na'ajej bar nayatz'man cui' li uva. Li yatz'lebal a'an retalil lix josk'il li Dios sa' xbeneb li tenamit. ²⁰ Ut que'xyatz' li ru li uvas sa' li yatz'lebal li cuan chirix li tenamit. Ut nabal li xya'al. Chanchan nima' nak qui-el sa' li yatz'leb. Quicuulac toj sa' reheb li cacuay ut quibec rok lix ya'al ut oxib ciento metro rok quicuulac. (Lix ya'al li ru li uvas a'an retalil xquiq'ueleb li cristian li te'camsik nak tarakek' atin sa' xbeneb).

15

Li cuukub chi ángel li que'c'amoc chak re li cuukub chi raylal sa'ruchich'och'

¹ Ut quicuil sa' choxa jun chic li sachba ch'olej rilbal. Quicuil cuukub li ángel ut cuan riq'uineb cuukub chi raylal. A'an li raylal li tac'ulmank sa' roso'jiqueb li cutan. Riq'uin li cuukub chi raylal a'an tatz'aklok ru lix josk'il li Dios. ² Ut quicuil jun li palau chanchan lem yo xxamlel. Ut chire a'an xakxoqueb li ac que'xcuy xcoloninquil li raylal ut cuanqueb lix arpa li Dios riq'uineb. Inc'a' que'xq'ue xcuanquil li josk' aj xul chi moco lix jalam uch, chi moco que'xc'ul lix numbril lix c'aba'. Inc'a' que'xq'ue rib chi balak'ic xban li xul. ³ Yoqueb chixbichanquil li bich li quixbicha laj

Moisés laj c'anjel chiru li Dios re xlok'oninquil li Jun li chanchan carner. Ut yoqueb chixyebal: — At Kacula', at nimajcual Dios, nim acuanquil ut sachba ch'olej rilbal li nacabánu. K'axal tíc ach'ol ut junelic nacaye li yal. Láat li tz'akal rey. K'axal nim acuanquil sa' xbeneb chixjunileb li tenamit. ⁴ ¿Ma cuan ta bi' junak inc'a' tixxucua acuu? Chixjunileb te'xnima acuu, at Kacula', xban nak ca'aj cui' láat tíc ach'ol. Chixjunileb li cuanqueb sa' li xninkal ru tenamit te'chálk ut te'xcuik'ib ribeb chacuu ut tate'xlok'oni xban nak te'xq'ue retal nak láat tatrakok atin sa' tiquilal. — ⁵ Ut chirix chic a'an quicuil nak quitehe' li lok'laj santil na'ajej sa' choxa bar xocxo cui' li contrato li quixbánu li Dios. ⁶ Ut li cuukub chi ángel que'el chak sa' xtemplo li Dios li yoqueb chak chixc'ambal li cuukub chi raylal. Tíkibanbileb riq'uin li saki t'icr lino li nalemtz'un. Ut bac'boqueb li re xch'ol riq'uin c'qamal sa' yíbanbil riq'uin oro. ⁷ Ut jun reheb li cahib li yo'yoqueb li chanchaneb ángel, quixq'ue reheb li cuukub chi ángel li cuukub chi sec'oro nujenak riq'uin xjosk'il li Dios, li yo'yo chi junelic k'e cutan. ⁸ Ut chanchan quinujac chi sib lix templo li Dios nak quinujac riq'uin xlok'al ut xcuanguilal li Dios. Ut ma ani quiru qui-oc aran toj retal quinume' li cuukub chi raylal li yoqueb chixc'ambal chak li cuukub chi ángel.

16

¹ Ut quicuabi jun xyab cucx quiatinac chak chi cau sa' lix templo li Dios. Quixye reheb li cuukub chi ángel: —Ayukex ut hoyomak chak sa' xbén li ruchich'och' lix josk'il li Dios li cuan sa' li cuukub

chi sec'.— ² Co li xben ángel ut quixhoy li cuan sa' lix sec' sa' xben li ruchich'och'. Ut quichal jun yajel sa' xbeneb chixjunileb li que'xc'ul xnumbril lix c'aba' li josk' aj xul jo'queb ajcui' li que'xlok'oni lix jalam Ɂch. Que'xoxo' rixeb ut k'axal ra que'xc'ul xban li yajel. ³ Ut li xcab ángel quixhoy li cuan sa' lix sec' sa' xben li palau. Ut li ha' quisuk'i chok' quic'. Chanchan xquiq'uel jun camenak. Ut quilaje'cam chixjunileb li cuanqueb sa' li palau. ⁴ Li rox ángel quixhoy li cuan sa' lix sec' sa' xbeneb li nima' ut sa' xbeneb li yu'am ha'. Ut li ha' quisuk'i chok' quic'. ⁵ Ut quicuabi nak li ángel li nataklan sa' xben li ha' quiatinaç ut quixye: —At Kacua', laat tic Ɂach'ol chi rakoc Ʌtin chi jo'ca'in. Laat ac cuancat chak sa' xticlajic ut laat cuancat anakcuan. Laat santo. Jo'can nak xatrakoc Ʌtin sa' xyalal sa' xbeneb li inc'a' useb xna'leb. ⁶ Xban nak a'an eb que'camsin reheb la cualal ac'ajol ut eb la profeta, jo'can nak xasuk'isi li ha' chok' quic' ut xaq'ueheb chiruc'. Xc'ulubeb nak te'xc'ul chi jo'can xban nak inc'a' us lix na'lebeb, chan. ⁷ Ut quicuabi jun yochak chi Ʌtinac sa' li artal. Ut quixye: — Relic chi yal, at Kacua', at nimajcual Dios, Laat nacatrakoc Ʌtin sa' xyalal ut sa' tiquilal, chan. ⁸ Ut li xca ángel quixhoy li cuan sa' lix sec' sa' xben li sak'e. Ut li sak'e quitikcuo' ru chi us ut quixc'ateb li cristian. Chanchan xtikcual li xam. ⁹ Eb li cristian que'c'ate' xban xtikcual li sak'e. Xban li raylal li yoqueb chixc'ulbal, que'xmajecua li Dios li cuan xcuanguil sa' xbeneb li raylal. Ut inc'a' que'yot'e' xch'oleb chi moco que'xq'ue xlok'al li Dios. ¹⁰ Ut li ro' ángel quixhoy li cuan sa' lix sec' sa' xben lix c'ojaribal li josk' aj xul. Ut chixjunileb li cuanqueb

rubel xcuquil que'cana sa' k'o^jyin. Chixjunileb yoqueb chixtiubal li ru'uj rak'eb xban li raylal yoqueb chixc'ulbal. ¹¹ Ut que'xmajecua li Dios li cuan sa' choxa xban li raylal ut li xox li yoqueb chixc'ulbal. Abanan inc'a' quiyot'e' xch'oleb ut inc'a' que'xcanab xb^qanunquil li m^qusilal. ¹² Ut li xcuak ángel quixhoy li cuan sa' lix sec' sa' xben li nima' Eufrates. Quichakic li ha' re te'numek' eb li rey li que'chal chak sa' eb li na'ajej li na-el cui' chak li sak'e. ¹³ Ut quicuil oxib li m^qus aj musik'ej. Yoqueb chi elc sa' re li dragón ut sa' re li josk' aj xul ut sa' re li xcab xul li cuan cuib xxucub, li profeta aj balak'. Li oxib chi m^qus aj musik'ej, a'an chanchaneb li amoch. ¹⁴ Eb li m^qus aj musik'ej a'in neque'xb^qanu sachba ch'olej. Neque'xic yalak bar sa' ruchich'och' chixch'utubanquileb li rey ut eb li tenamit re nak te'pletik sa' eb li cutan nak li nima-jcual Dios tapletik riq'uin li josk' aj xul. ¹⁵ Ut laín quicuabi nak li Kacua' quixye: —Laín tinchálk chi mac'a' sa' xch'oleb li tenamit jo' nak nachal laj elk'. Us xak re li ani nayo'lec re cuoybeninquil ut inc'a' nach'inan xch'ol sa' xpabal. A'an inc'a' taxutanák chicuu nak tinc'ulunk xban nak tic xch'ol, chan. ¹⁶ Ut que'xch'utub eb li rey li oxib chi m^qus aj musik'ej sa' li na'ajej Armagedón xc'aba' sa' hebreo. ¹⁷ Ut lix cuuk ángel quixhoy sa' ik' li cuan sa' lix sec'. Ut quicuabi jun yo chak chi qatinac sa' lix templo li Dios. Chi cau xyab xcux quixye: —Riq'uin a'in tatz'aklok ru li rakba qatin sa' xben li ruchich'och'. — ¹⁸ Ut quirepoc li rak' cak ut qui-abic nabal li xyab cuc. Quimok li cak. Ut quicuan jun nimla hic. Ma jun cua quinume' junak hic jo' a'an chalen sa' li cutan nak que'yo'obtesic li

cristian sa' ruchich'och'. ¹⁹ Li tenamit li k'axal nim xcuانquil quijache'. Oxib jachal qui-el. Ut eb li jun ch'ol chic tenamit quilaje't'ane'. Ut quijultico' re li Dios li māc que'xbānu li tenamit Babilonia. Jo'can nak quixq'ueheb chixtojbal rix lix māqueb chi tz'akal xban nak yo xjosk'il sa' xbeneb. ²⁰ Quilaje'sache' li ch'och' li sutsu sa' ha'. Que'sube' sa' ha'. Ut quilaje't'ane' li ninki tzul. ²¹ Quit'ane' ninki sakbach sa' ruchich'och'. Junk ciento libra rālal li junjunk chi sakbach. Ut que'nak sa' xbeneb li cristian ut que'xmajecua li Dios xban li nimla raylal li yoqueb chixc'ulbal.

17

Li ixf li naxc'ayi rib, a'an retalil li tenamit Babilonia

¹ Ut jun reheb li cuukub chi ángel, li cuanqueb li cuukub chi sec' riq'uineb, quixye cue: —Quim arin. Tinc'ut chacuu jun li ixf li naxc'ayi rib chunchu sa' xben li ha' retalil li nimal tenamit Babilonia li cuan xcuانquil sa' xbeneb nabal chi tenamit. Tinc'ut chacuu li tojba māc li xchal sa' xben li tenamit a'an xban li māusilal neque'xbānu. ² Chixjunileb li rey li cuanqueb sa' ruchich'och' neque'cuulac sa' li tenamit a'an chixbānunquil li māusilal. Chanchan nak ac xe'caltesic xban li māusilal yoqueb chixbānunquil, chan li ángel. ³ Sa' li visión li quixc'utbesi chicuu li Santil Musik'ej, quicuil nak li ángel quinixc'am sa' jun li na'ajej bar māc'a' cuan. Aran quicuil li ixf chunchu chirix jun li josk' aj xul cak rix. Tz'ibānbil nabal li qatín chirix re xmajecuanquil li Dios. Cuan cuukub xjolom

ut cuan lajeb xxucub. ⁴ Li iixk tikibanol riq'uin rak' púrpura ut cak. Lix sahab ru li rak' yíbanbil riq'uin oro ut tertóquil pec ut riq'uin perla. Cuan chak riq'uin jun li sec' oro nujenak riq'uin li mäusilal ut li yumbetac co'betal. ⁵ Ut tz'íbanbil sa' lix pequem jun li c'aba'ej mukmu xyáalal. A'an a'in li tz'íbanbil: Li nimla tenamit Babilonia a'aneb li neque'c'amoc be chi co'betal yumbetac ut chixbánunquil chixjunil li mäusilal. ⁶ Ut quicuil li iixk chanchan tacular xban xquiq'ueleb li ralal xc'ajol li Dios li que'camsic xban. Ut que'camsic ajcui' nabaleb li cristian li que'xch'olob resil li Cristo. Nak quicuil a'an, sachso inch'ol quincana. ⁷ Ut li ángel quixpatz' cue: —¿C'a'ut nak sachso ačh'ol xatcana? Lain tinch'olob chacuu li xyáalal li mukmu nak xcuán. Tinye acue c'a'ru xyáalal li iixk a'an jo' ajcui' li josk' aj xul li yo' chi ikanc re. Ut tinye ajcui' acue c'a'ru xyáalal lix jolom cuukub ut lix xucub lajeb. ⁸ Li josk' aj xul li xacuìl, a'an li quicuan, ut anakcuán ma ani chic. Abanan taelk cui'chic chak sa' li chamal jul ut tásachek' ru chi junaj cua. Ut li jo' q'uialeb li inc'a' tz'íbanbileb xc'aba'eb chalen sa' xticlajic li ruchich'och' sa' li hu li tz'íbanbil cui' xc'aba'eb li cuanqueb xyu'am chi junelic, eb a'an tásachk xch'oleb chirilbal li josk' aj xul li quicuan chak junxil ut ma ani chic anakcuán. Abanan tacular cui'chic. ⁹ Tento nak cuank ana'leb re nak tatau ru lix yalal. Li cuukub chi jolom, a'an retalil li cuukub chi coc' tzul li cuan cui' li tenamit. ¹⁰ Ut retalileb ajcui' li cuukub chi rey. Qb li rey ac xe'cuán ut xe'sache' ruheb, jun cuan anakcuán ut li jun chic toj maji' na-oc sa' xcuánquil. Ut nak taoc, inc'a' najt tabayk.

11 Ut li josk' aj xul li quicuan ut ma_ñ ani chic anakcuan, a'an li xcuakxak li rey ut xcomoneb rib riq'uineb li cuukub chi rey. A'an t̄asacheck' ru. **12** Ut li lajeb chi xucub li xacuil, a'an retalileb li lajeb chi rey li te'cuānk. Te'xc'ul xcuanguileb chi cuānc chok' rey, rochbeneb li josk' aj xul li cak rix. Abanan inc'a' najt t̄acuānk xcuanguil eb a'an. **13** Eb a'in junajak xc'a'uxeb ut te'xq'ue lix cacuilal ut lix cuanguilal re li josk' aj xul. **14** Eb li rey te'pletik riq'uin li Jun li chanchan carner. Abanan a'an t̄anumtak sa' xbeneb xban nak a'an li Kacua', li k'axal nim xcuanguil sa' xben chixjunil. Ut a'an li tz'akal rey li nim xcuanguil sa' xbeneb chixjunileb li cuanqueb xcuanguil sa' ruchich'och'. Ut li sic'bileb ru, li t̄iqueb xch'ol chixt̄akenquil, te'numtak ajcui' sa' xbeneb li rey, rochbeneb li Jun li chanchan carner.— **15** Quixye cue li ángel: —Li ha' li xacuil li chunchu cui' li ixx, a'an retalileb li xn̄inkal ru tenamit, a' yal ani xtepaleb xxe'tonil yucua'eb, ut a' yal chanru li ratinobaleb. **16** Li lajeb chi xxucub li josk' aj xul li xacuil, xic' te'rill li ixx li naxc'ayi rib. Te'xtz'ektaña li ixx ut te'xcanab chi māc'a' cuan re. T'ust'u te'xcanab. Te'xtiu lix tibel út li jo' q'uijal chic inc'a' te'xchoy te'xc'at sa' xam. **17** Li Dios quiq'uehoc re sa' xch'oleb li rey nak jo'can te'xbanu. Jo'can nak junajakeb lix c'a'ux chixq'uebal lix cuanguileb re li josk' aj xul re nak t̄ataklañk toj t̄atz'aklok ru li quixye li Dios. **18** Li ixx li xacuil, a'an retalil li nimla tenamit, li cuan xcuanguil sa' xbeneb chixjunileb li tenamit sa' ruchich'och'.—

18*Nak quisache' ru li tenamit Babilonia*

¹ Chirix a'an quicuil jun chic li ángel quicube chak sa' choxa. K'axal nim xcuauquil ut chixjunil li ruchich'och' quicutano' xban lix lok'al. ² Quixjap re chi cau xyab xcux ut quixye: —Xoso' li tenamit Babilonia. Xsache' xcuauquil li nimla tenamit Babilonia. Li tenamit a'an xcana chok' xna'ajeb laj tza ut eb li mäus aj musik'ej. Xcana chok' xna'ajeb laj xic'anel xul li k'axal yibeb ru li inc'a' neque'ti'e'. ³ Xsache' xcuauquil xban nak numtajenak li mäc neque'xbanu. Chixjunileb li rey li cuanqueb sa' ruchich'och' neque'cuulac Babilonia chixbanunquil li mäusilal riq'uineb. Chanchan calajenakeb xban li mäusilal yoqueb chixbanunquil. Ut eb laj c'ay que'biomo' aran xban nak nabal li c'a'ak re ru que'xc'ayi chi tertio xtz'ak, chan. ⁴ Ut quicuabi jun chic yo chak chi átinac sa' choxa ut quixye: —Ex ralal xc'ajol li Dios, elenkex sa' li tenamit a'an re nak inc'a' textz'akonk riq'uin lix maqueb ut re nak inc'a' textz'akonk riq'uin li raylal li te'xc'ul. ⁵ Xnumta lix maqueb. Chanchan xcuulac toj sa' choxa lix q'uijal. Li Dios yo chak chixq'uebal retal lix mäusilaleb. ⁶ Che'q'uehek' chixtoj li jo' q'uijal li raylal xe'xbanu reheb li jalaneb xtenamit. Chiq'uehek' rekaj li que'xbanu reheb. Ca' sut xq'uijal li raylal tabanuk reheb chiru li que'xbanu eb a'an. ⁷ Che'rahobtesik xban nak que'xnimobresi ribeb ut que'xbanu li mäusilal. Eb a'an neque'xye, “*Lao* chanchano li reina. Moco neba'o ta jo' junak xmälca'an. Lao mä jun cua takac'ul rahil ch'olej,” chanqueb.

8 Jo'can nak chiru jun cutan talaje'chálk li ray-lal sa' xbén li tenamit a'an. Táchálk cámec, ut yábac ut cue'ej sa' xbéneb. Li tenamit tásacheck' ru riq'uin xam xban nak k'axal nim xcuانquil li Kacua' li tarakok átin sa' xbeneb, chan. **9** Eb li rey li cuanqueb sa' ruchich'och' li que'cuulac aran Babilonia chixbañunquil li mausilal rochbeneb ut que'saho' sa' xch'oleb riq'uineb, tarahok' sa' xch'oleb chirilbal nak yok chi sachech' ruli tenamit. Te'yabak xban xrahil xch'oleb nak te'rilexibel li tenamit nak yok chi c'atc. **10** C'ajo' nak te'xucuak chirilbal li c'a'ru tixc'ul li tenamit. Te'xaklik chi najt riq'uin xban xxiuhéb ut te'xye: —Tok'ob ru li tenamit Babilonia li nim xcuانquil nak quicuan. Tok'ob ru lix nimal ru tenamit. Chiru jun c'amoc xrake' átin sa' xbéneb. — **11** Eb laj c'ay tarahok' sa' xch'oleb ut te'yabak chirix li tenamit xban nak ma ani chic tálok'ok re lix c'ayeb. **12** Ma ani chic tálok'ok re li oro, chi moco li plata, chi moco li chabil pec li tertio xtz'ak, chi moco li perlas. Ma ani chic tálok'ok re li chabil t'icr lino, chi moco li púrpura, chi moco li seda, chi moco li escarlata. Ma ani chic tálok'ok re li q'uila pay ru chi sununquil che'. Ut ma ani chic tálok'ok re li c'a'ak re ru yibanol riq'uin marfil, chi moco riq'uin li chabil che', chi moco riq'uin li ch'ich' hierro ut cobre, chi moco li yibanol riq'uin li pec mármol. **13** Ma ani chic tálok'ok re li canela, li sununquil ban, li incienso, li mirra ut li olíbano. Ma ani chic tálok'ok re li vino, li aceite, li trigo ut li chabil c'aj. Ut ma ani chic tálok'ok re li cuacax, li carner ut li cacuay, chi moco te'xlok' li carruajes, chi moco te'xlok' chic li rech cristianil chok' moseb. **14** Eb laj c'ay te'xye

reheb li tenamit: —Chixjunil li chabil li quera ru, a'an ac xsach cheru. Mac'a' chic le biomal chi moco ech'ina'usal. Ma jok'e chic tetau li c'a'ak re ru a'an.— ¹⁵ Ut eb li neque'c'ayin li c'a'ak re ru a'in te'xaklik chi najt riq'uin li tenamit xban xxiuheb nak te'ril li raylal li yokeb chixc'ulbal li tenamit. Eb laj c'ay li que'biomo' xbaneb, te'yabak ut te'xye: ¹⁶ —Tok'obeb ru. Tok'obeb ru li cuanqueb sa' li nimla tenamit a'an. Junxil que'xtikib ribeb riq'uin li chabil t'icr lino ut púrpura ut caki t'icr. Ut que'xq'ue chok' xsahob ru li oro, ut li tertquil pec ut li perla. ¹⁷ Ut yal chiru junpat x-oso' chixjunil lix biomaleb, cha'akeb. Ut eb laj echal jucub ut eb li neque'xberesi li jucub sa' li palau ut chixjunileb li neque'trabajic sa' li ninki jucub, jo'queb laj c'ay li neque'xic sa' li jucub, que'xakli chi najt chi rilbal. ¹⁸ Ut que'xjap re nak que'ril nak yo chi c'atc li tenamit ut que'xye: —Ma jun chic tenamit juntak'et riq'uin li tenamit a'in nak quicuan, chanqueb. ¹⁹ Que'xq'ue poks sa' xjolomeb retalil lix rahil xch'oleb ut que'yabac ut que'xjap reheb chixyebal: —¡Tok'obeb ru! ¡Tok'obeb ru li cuanqueb sa' li tenamit a'an! Riq'uin lix biomaleb li tenamit a'an xobiomo' lao li nococ'anjelac sa' jucub. Ut chiru junpat quisache' ru li tenamit, chanqueb. ²⁰ —Chisahok' sa' ech'ol laex li cuanqueb sa' choxa. Laex laj paabanel, laex profeta ut laex apóstol, chisahok' taxak sa' ech'ol xban nak li Dios xrakoc atin sa' xbeneb sa' ec'aba' laex, chan li yo chak chi atinac sa' choxa. ²¹ Ut jun li ángel cau rib quixchap jun li nimla pec, chanchan li nimla pec li neque'rocsi re li molino, ut quixcut sa' li palau ut quixye: —Jo' nak xsach li pec

a'in sa' li palau, jo'can ajcui' nak tasachek' ru li tenamit Babilonia. Inc'a' chic tailek' ru. ²² Inc'a' chic taabik sa' li tenamit a'an lix yab li cuajb chi moco lix yab li arpa, chi moco li xyab li xolb ut li trompeta. Ut inc'a' chic te'cuank sa' li tenamit a'an li neque'xnau trabajic chi us riq'uin li c'a'ak re ru, ut inc'a' chic taabik xyab junak molino sa' li tenamit a'an. ²³ Inc'a' chic tailmank junak xam sa' li tenamit a'an. Ut inc'a' ajcui' taabik xyab xcuxeb li neque'saho' sa' xch'oleb sa' junak sumlac. Te'xc'ul chi jo'can xban nak eb laj c'ay li que'cuan sa' li tenamit a'an que'xnimobresi ribeb, ut riq'uin li tulac que'xbanu, que'xbalak'i chixjunileb li tenamit.— ²⁴ Sa' ajcui' li tenamit a'an que'camsic li ralal xc'ajol li Dios ut eb li profeta. Li tenamit a'an quic'amoc be chiruheb li tenamit sa' ruchich'och' chixcamsinqueleb laj pabanel yalak bar.

19

Li lok'oninc li que'xbanu sa' choxa

¹ Chirix chic a'an quicuabi nak nabaleb que'ec'an sa' choxa. Chi cau xyab xcuxeb yoqueb chixyebal: —Aleluya. Lok'oninbil taxak li Kacua'. Li kaDios, a'an li nacoloc. A'an li k'axal nim xcuanguil ut xc'ulub nak talok'onik. ² A'an tic xch'ol chi rakoc qatin sa' xyalal. A'an xrakoc qatin sa' xben li nimla tenamit li chanchan jun li ixs naxc'ayi rib. Xban nak numtajenak lix mausilal, a'an quipo'oc ruheb li tenamit li cuanqueb sa' ruchich'och'. Li Dios xq'ueheb chixtojbal rix lix maqueb xban nak que'xcamsi nabaleb laj canjel chiru.— ³ Ut que'xye cui'chic: —Aleluya, lok'oninbil taxak li Dios. Lix sibel li tenamit a'an

tatakek' chi junelic k'e cutan nak yok chi c'atc.—
 4 Ut li cahib xca'c'al li c'ojc'o queb sa' xc'ojaribaleb
 jo'queb ajcui' li cahib li yo'yoqueb li chanchaneb
 ángel que'xcuik'ib ribeb ut que'xlok'oni li Dios
 li c'ojc'o sa' li lok'laj c'ojaribal ut que'xye:
 —Lok'oninbil taxak li Kacula'. Jo'can taxak,
 chanqueb. 5 Ut quicuabi jun yo chak chi atinac sa'
 li lok'laj c'ojaribal ut quixye: —Chelok'onihak li
 kaDios chejunilex laex li nequexc'anjelac chiru.
 Chelok'onihak li Kacula' laex li nequexucua ru,
 laex li cuan ecuanquil jo' ajcui' li mac'a' ecuanquil.
 — 6 Ut quicuabi cui'chic xyab xcuxeb nabaleb li
 cuanqueb sa' choxa. Chanchan xyab lix cau ok li
 palau ut chanchan nak namok li cak. Que'xye: —
 Aleluya. Li Kacula' li nimajcual Dios, a'an cuan
 sa' xcuanquil. 7 Chisahok' taxak sa' kach'ol.
 Chikaq'ue xlok'al li Kacula' xban nak xcuulac
 xk'ehil lix sumlajic li Jun li chanchan carner. Li
 ixakilbej ac xcauresi rib. 8 Quiq'uehe' li chabil lino
 re xtikibanquil rib. Sak ru li rak' ut nalemtz'un.
 Li saki lino a'an retalil lix tiquilal xch'oleb li
 ralal xc'ajol li Dios. — 9 Ut li ángel quixye cue:
 —Tz'iba retalil a'in: Us xak reheb li bokbileb
 chixinink'einquil lix sumlajic li Jun li chanchan
 carner. Ut quixye ajcui' cue: —A'in ratin li Dios
 ut tz'akal yal, chan. 10 Lain quincuik'ib cuib chiru
 chixlok'oninquil. Ut a'an quixye cue: —Mabanu
 a'an. Lain yal aj c'anjelin chiru li Dios jo' lat, ut
 jo' eb ajcui' la cuech aj paabanelil, li neque'xpab
 li xyalal li quixch'olob li Jesús. Li Dios, a'an li
 talok'oni, chan cue, xban nak li quixch'olob li
 Jesús, a'an ajcui' li musik'anbil reheb li profeta.

Li Jun li chunchu chirix jun li cacuay sak rix

¹¹ Ut teto li choxa nak quicuil. Quicuil jun li cacuay sak rix. Ut lix c'aba' li c'ojc'o chirix li cacuay, a'an "Tz'akal Dios" ut "Tic Xch'ol", xban nak a'an sa' tiqual tarakok atin ut sa' tiqual tapletik. ¹² Lix nak' ru chanchan xam. Nabal li corona cuan sa' xjolom ut tz'ibabil lix c'aba' chiru. Abanan ma ani nata'oc ru. Ca'aj cui' a'an. ¹³ Cuan quic' chiru li rak' ut lix c'aba' a'an "Ratin li Dios". ¹⁴ Nabaleb li cuanqueb sa' choxa yoqueb chi takenc re. Tiktoqueb riq'uin li saki t'icr lino ut sak ru. Yoqueb chi xic chirix li cacuay sakeb rix. ¹⁵ Li Tic Xch'ol cuan jun li k'esnal ch'ich' sa' re, re xsachbal xcuانquileb li xninkal ru tenamit. Cau tataklang sa' xbeneb. Chanchan riq'uin jun xuk' ch'ich' tixtaklaheb. Chanchan nak nayatz'e' li ru li uvas nak tarakok atin sa' xbeneb riq'uin xjosk'il li Dios. ¹⁶ Tz'ibabil xc'aba' chiru li rak' ut chiru li ra'. A'an a'in lix c'aba': Li Rey li k'axal nim xcuانquil sa' xbeneb chixjunileb li rey. Li Kacua', li k'axal nim xcuانquil sa' xbeneb chixjunileb li neque'taklan. ¹⁷ Ut quicuil jun li ángel xakxo chiru li sak'e. Chi cau xyab xcux yo chi atinac riq'uineb chixjunileb laj xic'anel xul li neque'ti'oc tib, li yoqueb chi rupupic chiru choxa. Quixye reheb: —Quimkex. Ch'utubomak erib chi cua'ac sa' li nink'e li ac xcauresi li Dios. ¹⁸ Quimkex ut tiuhomakeb lix tibebeb li rey li cuanqueb sa' ruchich'och' jo' ajcui' lix tibebeb li neque'taklan sa' xbeneb li soldado. Tiuhomakeb xtibebeb li cauheb rib jo'queb ajcui' li cacuay ut eb li cuink li neque'xic chirixeb. Tiuhomakeb xtibebeb chixjunileb, jo' li lok'bil chi c'anjelac jo'

ajcui' li inc'a' lok'bil, jo' li cuanqueb xcuanquil ut jo' ajcui' li m^{ac}'a'eb xcuanquil.— ¹⁹ Quicuil ru li josk' aj xul ut eb li rey li cuanqueb sa' ruchich'och' rochbeneb li soldado li neque'c'anjelac chiruheb. Que'xch'utub rib re te'pletik riq'uin li Tic Xch'ol li cuan chirix li cacuay sak rix rochbeneb li neque'taken re. ²⁰ Li josk' aj xul quichape' xban li Tic Xch'ol li cuan chirix li cacuay sak rix ut quichape' ajcui' li profeta aj balak', li quixbanu li sachba ch'olej sa' xc'aba' li josk' aj xul. Riq'uin li sachba ch'olej quixbanu quixbalak'i nabaleb li tenamit chixc'ulbal li retaliil li josk' aj xul ut que'xlok'oni lix jalam uch. Chi xcabichaleb li josk' aj xul ut li profeta aj balak' que'cute' chi yo'yoqueb sa' li xxamlel li azufre li chanchan nimla palau. ²¹ Ut li jun ch'ol chic li neque'c'anjelac chiru li josk' aj xul que'sache' ruheb riq'uin li k'esnal ch'ich' li cuan sa' re li Tic Xch'ol li cuan chirix li cacuay sak rix. Ut chixjunileb laj xic'anel xul li neque'ti'oc tib que'nujac xsa'eb riq'uin xtibebeb li jo' q'ual que'cam.

20

Li jun mil chihab

¹ Quicuil jun chic li ángel yo' chak chi cubec sa' choxa. Cuan chak sa' ruk' xlauhil li nimla chamal jul jo' ajcui' jun li nimla cadena. ² Quixchap li dragón. A'an li c'anti' li ac cuan ajcui' chak najter. A'an laj tza. Satanás nayeman re. Nak quixchap, quixbac' ut quixcanab chi bac'bo chiru jun mil chihab. ³ Quixcut sa' li nimla chamal jul ut quixtz'ap xb^en ut quixq'ue jun sello chiru re nak inc'a' chic tixbalak'iheb li tenamit chiru li jun mil

chihab. Chirix a'an t_{aq}ach'ab_{aq}. Abanan inc'a' najt tacu_{aq}nk. ⁴ Ut quicuileb li c'ojaribal li que'c'ojla cui' li que'q'uehe' xcuanquil chi rakoc _atin. Que'cuil li que'camsic xban nak que'xch'olob resil li Jesús ut xban nak que'xch'olob r_atin li Dios. Inc'a' que'xlok'oni li josk' aj xul chi moco lix jalal uch. Ut inc'a' quiq'uehe' retalil li xul sa' xpequemeb chi moco chi ruk'eb. Que'cuacli cui'chic chi yo'yo ut que'cuan xcuanquil rochbeneb li Cristo chiru jun mil (1,000) chihab. ⁵ A'an a'in li xb_en cuaclijkeb li camenak chi yo'yo. Ut eb li camenak jun ch'ol chic inc'a' que'cuacli chi yo'yo toj t_atz'aklok ru li jun mil chihab. ⁶ Us xak reheb li te'tz'akonk sa' li xb_en cuaclijkeb li camenak chi yo'yo. A'aneb li ralal xc'ajol li Dios. Ut lix cab li c_am_c, mac'a'ak chic xcuanquil sa' xb_en_eb. A'anakeb chic li te'c'anjelak chiru li Dios ut chiru li Cristo chok' aj tij. Ut te'cu_{aq}nk xcuanquileb rochben li Cristo chiru jun mil chihab.

Quisache' xcuanquil laj tza

⁷ Nak acak xnume' li jun mil chihab, t_{aq}ach'ab_{aq} laj tza ut t_aelk sa' li nimla chamar jul li tz'aptz'o cui'. ⁸ Ut t_{aq}xic sa' chixjunil li ruchich'och' chixbalak'inquileb li tenamit yalak bar jo' li cuanqueb aran Gog ut Magog. Ut tixch'utubeb re nak te'pletik. K'axal nabalakeb jo' xq'uial li coc' ru li samaib li cuan chire li palau. ⁹ Yalak bar sa' ruchich'och' te'ch_alk chi pletic ut te'xsut li tenamit li raro xban li Dios li cuanqueb cui' li ralal xc'ajol. Li Dios tixtakla chak li xam sa' choxa ut tixsach ruheb chixjunileb li xic' neque'iloc re. ¹⁰ Ut laj tza li quibalak'in reheb t_acutek' sa' xxamlel li azufre

li chanchan nimla palau li cuanqueb cui' li josk' aj xul ut li profeta aj balak'. Ut aran te'rahobtesik chi k'ek chi cutan chi junelic k'e cutan.

Nak tarakek' qatin sa' roso'jic li ruchich'och'

¹¹ Ut quicuil jun li saki c'ojaribal. Ut li Jun li chunchu aran k'axal nim xcuانquil. Xban xanimal xcuانquil, mäc'a' chic li ruchich'och' ut mäc'a' chic li choxa. Que'sach chi junaj cua nak quicuil. ¹² Ut que'cuil chixjunileb li camenak, jo' nink jo' coc', xakxoqueb chiru li chunchu sa' li c'ojaribal. Ut que'teli li hu li tz'ibanol cui' lix yehom xbañuhomeb. Ut quitehe' ajcui' li hu li tz'ibanol cui' xc'aba'eb li cuanqueb xyu'am chi junelic. Ut quirake' qatin sa' xbeneb li camenak a' yal chanru lix yehom xbañuhomeb jo' tz'ibanol retaliil sa' li hu. ¹³ Chixjunileb li camenak cuanqueb aran, jo' eb li que'cam sa' ha' jo'queb ajcui' li que'muke'. Quirake' qatin sa' xbeneb chixjunileb a' yal chanru lix yehom xbañuhomeb. ¹⁴ Ut quisache' xcuانquil li cäm, ut quisache' ajcui' li na'ajej li neque'xic cui' li camenak. Que'cute' sa' li xam li chanchan palau. Li xam a'an, a'an li xcab cäm. ¹⁵ Ut li ani inc'a' quita'e' xc'aba'eb sa' li hu li tz'ibanol cui' xc'aba'eb li cuanqueb xyu'am chi junelic, a'aneb li que'cute' sa' li xam li chanchan palau.

21

Li Ac' Jerusalén

¹ Ut quicuil ajcui' jun ac' choxa ut jun ac' ruchich'och' xban nak li xbën choxa ut li xbën ruchich'och' mäc'a' chic. Ac xsache'. Ut mäc'a'

chic li palau. ² Ut quicuil nak yo chak chi cubec sa' choxa cuan cui' li Dios li santil tenamit, li Ac' Jerusalén. C'ajo' xch'ina'usal. Chanchan jun li ixakilbej tikibanol chi chabil xban nak oc re chi sumlac. ³ Ut quicuabi jun yo chak chi atinac cuan cui' li c'ojaribal ut quixye chi cau xyab xcux: —Anakcuán tacular li Ðios riq'uineb li cristian. A'anakeb li ralal xc'ajol. Li Ðios tacular riq'uineb. A'anak lix Dióseb. ⁴ Mac'a'ak chic rahil ch'olej. Mac'a'ak chic li cámč chi moco li yábac chi moco li yot'ec', chi moco li raylal xban nak chixjunil li c'a'ak re ru a'an, ac xelaje'ume'. — ⁵ Li c'ojc'o sa' li c'ojaribal quixye: —Lain tinac'obresi chixjunil li c'a'ak re ru. Ut quixye ajcui': —Tz'iba retalil a'in xban nak li qatin a'in tz'akal yal ut us xpabánquil. ⁶ Ut quixye cue: —Xtz'akloc ru chixjunil. Lain li Alfa ut li Omega. Lain tinq'ue chi mañan li yu'am chi junelic re li ani taraj jo' nak taq'uehek' chi uc'ac li ani tachakik re. ⁷ Li ani tixcuy xnumsinquil li raylal ut inc'a' tach'inank xch'ol sa' lix pabal, a'an tarechani chixjunil li c'a'ak re ru a'in. Lainak lix Ðios ut a'anak li cualal inc'ajol. ⁸ Abanan li c'a'ru te'rechani li inc'a' useb xna'leb, a'an li xxamlel li azufre li chanchan palau, a'an lix na'ajeb li neque'xucuac, ut eb li inc'a' neque'paban, ut eb li que'xmux ru lix pabaleb, ut eb li neque'xcamsi ras ritz'in, ut eb laj co'bët laj yumbet, ut eb laj tul, ut eb li neque'lok'onin jalani dios, jo'queb ajcui' laj tic'ti'. Li c'a'ru te'rechani eb a'an, a'an li xcab camic nak te'cutek' sa' li xam. — ⁹ Quichal jun reheb li cuukub chi ángel li que'cuan li cuukub chi sec' riq'uineb, li cuan cui' li cuukub chi raylal li que'xc'ul sa' roso'jic, ut quixye cue: —Quim.

Tinc'ut chacuu li iixk li t̄asumlāk cui' li Jun li chanchan carner, chan. ¹⁰ Riq'uin xcuauquil li Santil Musik'ej, xinixc'am sa' xb̄en jun li nimla tz̄ul najt xteram ut quixc'ut chicuu li santil tenamit Jerusalén, yo chak chi cubec sa' choxa riq'uin li Dios. ¹¹ Lix lok'al li Dios cuan riq'uin. C'ajo' xch'ina'usal. Chanchan jun li tertóquil pec jaspe. K'axal xchak'al ru ut nalementz'un jo' li lem. ¹² Li tenamit sutsu sa' jun nimla tz'ac najt xteram ut cuan cablaju li oquebal. Cablaju chi ángel cuanqueb sa' eb li oquebal. Chiru li oquebal tz'ibabil retalileb li xc'aba'eb li cablaju xt̄epaleb li ralal xc'ajol laj Israel. ¹³ Oxib li oquebal cuan sa' li norte, oxib cuan sa' li sur, oxib cuan bar na-el cui' li sak'e ut oxib cuan bar na-oc cui' li sak'e. ¹⁴ Cablaju li pec li qui-oc chok' xcimiento li tz'ac li sutsu cui' li tenamit. Ut chiruheb a'an tz'ibabil retalileb lix c'aba'eb li cablaju chi apóstol li que'c'anjelac chiru li Jun li chanchan carner. ¹⁵ Li ángel li quiatinac cuiq'uin cuan jun lix bisleb riq'uin yibabil riq'uin oro re xbisbal li tenamit ut li oquebal jo' ajcui' li tz'ac. ¹⁶ Ca xucut li tenamit nak quicuil. Lix nimal rok juntak'et riq'uin xnimal ru. Li ángel quixbis li tenamit riq'uin lix bisleb. Cuib mil kilómetro riq'uin cuib ciento kilómetro lix bisbal. Juntak'et xbisbal li rok, li ru ut lix teram. ¹⁷ Chirix a'an quixbis li tz'ac li sutsu cui' li tenamit. Lix bisbal a'an ob xcac'al metro (65). Li ángel quixbis li tz'ac jo' neque'bisoc sa' ruchich'och'. ¹⁸ Li tz'ac yibabil riq'uin li chabil pec jaspe. Li tenamit yibabil riq'uin tz'akal oro. Nalemtz'un. Chanchan lem. ¹⁹ Li pec li qui-oc chok' xcimiento li tenamit cuan xsahob ru

yibambil riq'uin q'uila pay ru chi tertóquil pec. Li xbén pec, a'an li chabil pec jaspe; lix cab, a'an zafiro; li rox, a'an ágata; li xcá, a'an esmeralda. ²⁰ Li ro', a'an ónica; li xcuak, a'an cornalina; li xcuuk, a'an crisólito; li xcuakxak, a'an berilo; ut li xbele, a'an topacio; li xlaje, a'an crisopraso; li xjunalju, a'an jacinto; ut li xcablaju, a'an amatista. ²¹ Li cablaju chi oquebal, yibambleb riq'uin cablaju chi tertóquil perla, jun sa' li junjunk chi oquebal. Eb li be sa' li tenamit yibambleb riq'uin tz'akal oro. Nalemtz'un. Chanchan lem. ²² Quicuil nak sa' li tenamit a'an mac'a' lix templo li Kacua' bar te'xic li tenamit chi lok'oninc. Mac'a' chic aj e xban nak li Kacua' li k'axal nim xcuanguil cuan aran riq'uineb chi junelic. Ut cuan ajcui' aran li Jun li chanchan carner. ²³ Mac'a' li sak'e aran ut mac'a' li po xban nak li Dios cuan aran ut lix lok'al li Dios nacutanobresin re. Ut lix lok'al li Jun li chanchan carner nacutanobresin re li tenamit. ²⁴ Eb li xninkal ru tenamit li te'colek', te'cuank sa' cutan saken. Ut eb li que'cuau xlok'al sa' ruchich'och', eb a'an te'xq'ue xlok'al li tenamit. ²⁵ Eb li oquebal inc'a' te'tz'apek' xban nak junelic cutanak. Mac'a'ak k'ojoyin. ²⁶ Eb li que'cuau xlok'al sa' ruchich'och' te'xq'ue xlok'al li tenamit. ²⁷ Li ani cuanqueb xmac inc'a' taruk te'oc aran. Eb li neque'xbanu mausilal chi moco li neque'tic'ti'ic, te'oc sa' li tenamit a'an. Li ani te'oc aran, ca'aj cui' li tz'ibambleb xc'aba' sa' lix hu li Jun li chanchan carner, li hu li tz'ibambil cui' xc'aba'eb li cuanqueb xyu'am chi junelic.

22

¹ Ut li ángel quixc'ut chicuu li nima' li naq'uehoc yu'am chi junelic. Li ha' sak sak ru. Chanchan lem. Na-el chak cuan cui' lix lok'laj c'ojaribal li Dios ut li Jun li chanchan carner. ² Li nima' a'an nanume' sa' xyi li tenamit. Chire li nima' xca' pac'alil cuan li che' retalill li junelic yu'am. Cablaju pay li ru naxq'ue ut rajlal po nauchin. Lix xak nac'anjelac re xq'uebal xcacuilaeb lix ninkal ru tenamit. ³ Aran mact'a'ak chic mausilal. Lix lok'laj c'ojaribal li Dios tacuank aran ut tacuank ajcui' lix lok'laj c'ojaribal li Jun li chanchan carner. Ut eb laj c'anjal chiru te'lok'onink re. ⁴ Eb a'an junelic yokeb chiribal ru ut tz'ibanolik lix c'aba' sa' xpequemeb. ⁵ Aran mact'a'ak chic k'ojyin. Jo'can nak inc'a' chic tac'anjelak reheb li sak'e chi moco li candil. Li Kacula' Dios, a'an chic li tacutanobresink reheb. Ut te'cuank aran chi k'axal sa sa' xch'oleb. Chanchanakeb chic rey.

Nak tachalk cui'chic li Jesucristo

⁶ Ut li ángel quixye cue: —Eb li atin a'in tz'akal yal ut us xpabankil. Li Kacula' Dios li nac'utbesin chiruheb lix profeta c'a'ru te'xye, a'an xtakla chak lix ángel chixc'utbal chiruheb laj c'anjal li c'a'ru tac'ulmank chi seb.— ⁷ Li Jesús quixye: —Q'uehomak retal. Chi seb tinchalk lain. Us xak re li ani naxc'ula sa' xch'ol li atin li tz'ibanolik sa' li hu a'in chirix li c'a'ru talajc'ulmank mokon, chan. ⁸ Lain laj Juan li quin-abin ut quin-iloc re chixjunil li c'a'ak re ru a'in. Nak acak xcuabi ut nak acak xcuil, quincuik'ib cuib chiru li ángel li quic'utuc chicuu chixjunil li c'a'ak re ru a'in re

raj xlok'oninquil. ⁹ Abanan li ángel quixye cue: —Mábanu chi jo'can. Minálok'oni. Lain yal aj c'anjelin jo' laat, jo'eb ajcui' li profeta la cuech aj pabanelil, jo'queb ajcui' li neque'pában re li atin li tz'ibanol sa' li hu a'in. A' li Dios, a'an li talok'oni ru, chan. ¹⁰ Ut quixye ajcui' cue li ángel: —Mamuk chiruheb li tenamit li xyalal li tz'ibanol sa' li hu a'in. Mamuk chiruheb li c'a'ru tac'ulmank xban nak cuulac re xk'ehil nak tac'ulmank li c'a'ru tz'ibanol sa' li hu a'in. ¹¹ Li ani yok chixbanunquil li mäusilal, xbanuhak li mäusilal. Ut li ani yok chi macobc, xbanuhak li mac. Li ani tic xch'ol, yok chixbanunquil li tiquilal. Li ani santobresinbil, chicuank sa' santilal. — ¹² —Q'uehomak retal, chan li Jesús. —Lain chi seb tinchalk ut tinc'am chak le k'ajcamunquil. Tinq'ue xk'ajcamunquil li junjunk a' yal chanru lix yehom xbanuhom. ¹³ Lain li Alfa ut li Omega. Lain ac cuanquin chak sa' xticlajic li ruchich'och' ut cuankin ajcui' sa' roso'jic. — ¹⁴ Us xak reheb li cuybil sachbil xmaqueb xban li Dios, xban nak eb a'an taruk te'xtzaca li ru li che' li retalil li junelic yu'am. Ut te'oc ajcui' sa' li oquebal re li tenamit. ¹⁵ Abanan li inc'a' useb xna'leb inc'a' taruk te'oc sa' li tenamit a'an, chi moco laj tul, chi moco laj co'bet laj yumbet, chi moco li neque'xcamsi ras ritz'ineb ut eb li neque'lok'onin jalani dios jo'queb ajcui' li neque'cuulac chiru balak'ic ut tic'ti'ic. ¹⁶ Ut li Jesús quixye: —Lain xintakla lin ángel acuiq'uin re nak tach'olob li xyalal a'in reheb laj pabanel. Lain li chanchanin xtux li che'. Quinyo'la sa' xyankeb li ralal xc'ajol li rey David. Lain chanchanin li cak chahim li nalemz'un chak toj ek'ela, chan li Jesús.

17 Li Santil Musik'ej ut li ixakilbej neque'xye: — Chalkex.— Li ani taqabink re li aqtin a'in, chixyehak ajcui' —chalkex.— Li ani taraj ruc'bal li ha', li retalil li junelic yu'am, chichalk chi uc'ac chi matan.

18 A'an a'in li tinye re li ani taqabink reheb li aqtin li tz'ibabil sa' li hu a'in chirix li tac'ulmank mokon: Cui ani tixq'ue xtz'akob li aqtin a'in, li Dios tixq'ue li raylal sa' xben jo' tz'ibabil retalil sa' li hu a'in.

19 Ut cui ani tarisi junak reheb li aqtin li tz'ibabil sa' li hu a'in, taisiklix c'aba' xban li Dios sa' li hu li tz'ibabil cui'lix c'aba'eb li cuanqueb xyu'am chi junelic. A'an inc'a' taoc sa' li santil tenamit, chi moco tacuanklix yu'am chi junelic jo' tz'ibabil retalil sa' li hu a'in. **20** Li Jesús li nach'oloban xyalal li c'a'ak re ru a'in naxye: —Relic chi yal chi seb tinchalk.— Jo'can taxak. Chalkat, at Kacua' Jesús. **21** A' taxak li usilal li naxq'ue li Kacua' Jesucristo chicuank eriq'uin chejunilex laex laj pabanel. Jo'can taxak.

**Li Santil hu
Bible in Q'eqchi' (GT:kek:Q'eqchi')**

copyright © 2000 Wycliffe Bible Translators, Inc.

Language: Q'eqchi'

Translation by: Wycliffe Bible Translators, Inc.

Q'eqchi' [kek], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Q'eqchi'

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
f1b065df-5ef5-5c8a-a273-af2b9aefff55